


# WANTOK



NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,346

Wik i stat long Fonde Epril 13, 2000

70t

Kat nia long kaunim gen Namatanai vot

pes 2

Ol ripot long palamen

pes 3

Karani tok lukaut long Asaro pait

pes 7

Tokpilal wantaim Kanaga

pes 25-26

## Sir Maino go pas long sekim NPF

WENCESLAUS MAGUN  
i raitim

PRAIM Minista Sir Mekere Morauta i tokim Palamen aste olsem Gavman bilong em i makim Sir Charles Maino olsem Siaman bilong Komisen bilong sekim hevi insait long Nesenel Providen Fan.

Sir Charles i no longtaim i go pinis i bin holim wok bilong Sief Ombudsmen Komisina na tu i bin wok olsem Seketeri bilong Jastis Dipatmen.


Sir Mekere i tok dispela Komisen bai statim wok bilong en long pinis bilong dispela mun na ol pablik bai kisim toksave long wanem wok ol i mekim insait long ol nius stori.

Em bai makim tupela arapela Komisina long helpim Sir Charles taim em i pinisim wok bilong toktok wantaim sampela gutpela kendidet. Em i tok dispela tupela arapeal Komisina bai i gat gutpela pasin, i gat save, na planti yia bilong wok insait long kain wok olsem.

Sir Mekere i makim tu wanpela loya husat i gat planti yia bilong save bilong wok long lo, John Reeve olsem Ligel Kaunsel long helpim Komisen. Em i tok tupela juria kaunsel, Annette Kora, ligel opisa wantaim Dipatmen bilong Praim Minista na Nesenel Eksekutiv Kaunsel na wanpela sinia loya we em yet bai makim long Dipatmen bilong Atoni Jenerel bai helpim Mista Reeve.

Sir Mekere i tok neks wik, em bai makim tu wanpela biknem intanesenel akaunten kampani long helpim dispela Komisen bihain long wok bilong skelim ol kampani i pinis.

Em makim tu Gerard Dogimab, wanpela sinia opisa bilong Dipatmen bilong Praim Minista olsem Seketeri bilong dispela Komisen wantaim astingting bilong mekim wok bilong



• Sir Charles Maino.

Komisen i moa indipenden long Gavman.

Sir Mekere i tok dispela Komisen i gat 5-pela bikpela wok long mekim, long ripot:

- Sapos, long sait bilong pasin bilong lukautim mani, sampela lain, kampani, bisnis, lo grup o ejensi namel long 1995 na 1999 i brukim lo. Moa yet, ol Bod Ov Trasti, Menesmen, ol opisa bilong NPF, ol pablik opisa wantaim ol minista bilong kantri, na ol arapela pipel o ogenaisesen i mekim kain pasin olsem. Dispela wok bai lukluk tu long wanem kain ol invesmen na ol arapela wok ol dispela lain i mekim o i mekim long nem bilong NPF;

- Sapos i bin gat sampela pasin we ol ausait pipel o grup i mekim we i brukim lo o i no bihainim lo long kisim dinau na mekim invesmen, o ol arapela pasin i no stret;

- Sapos insait long pasin bilong brukim lo, wanpela bilong ol trasti o wok manmeri i ken kisim tok long sanap long ai bilong wanem grup i gat pawa long kotim ol long brukim bikpela lo, sasim ol o mekim narapela pasin;

- Sapos insait long pasin bilong brukim lo, i gat pasin i soim olsem wanpela trasti, o wok manmeri i noken karim hevi nating. Sapos wanpela trasti o wok manmeri i ken karim tok long ol disisen na samting i

I go moa long pes 2

# Givim bikpela mekimsave long ol raskol

STRONGPELA singaut i go long gavman na ol atoriti long kantri long givim bikpela mekim save long ol man husat i save wokim ol bikpela rong.

Long ol bikpela mekim save, ol meri lida i askim gavman long glasim gen kapitel panismen o kilim dai man husat i wokim bikpela rong olsem kilim dai narapela na bagarapim ol meri na pikinini. Na tu katim samting bilong ol dispela bikhet man o wanpela hap long bodi bilong ol olsem pinga na yau samting.

Presiden bilong Nesenel kaunsel ov Wimen Susan Setae i tok bai i gat ol stop wok na mas long ol meri i strongim sait bilong ol long dispela samting sapos gavman i no wokim wanpela samting long singaut bilong ol.

Insait long wanpela bung bilong ol long dispela wik, ol meri lida i bin singautim gavman long kirapim na skruim Vegrensi lo we bai kontrolim wok-

about bilong ol man i raun long laik bilong ol. Ol i laikim tu ol mas katim samting bilong ol man long semim ol na givim mekim save long rong ol i wokim na hevi ol i kamapim taim ol i bagarapim ol meri na pikinini meri na kilim dai ol narapela man.

Tu ol i laikim gavman long kamapim long bilong kapitel panismen. Bipo ol meri lida i save egensim kapitel panismen bikos ol i tingim ol pikinini man tasol nau pasin bilong bagarapim ol meri na pikinini meri i go bikpela na i nogat narapela rot tasol ol i singaut nau long givim bikpela mekim save i go long ol man.

Ol meri lida i bung na mekim ol toktok bihain long planti keis i kamap long las na dispela wik long bagarapim ol meri wantaim tu ol dispela i gat bel.

Ol meri lida i laikim gavman long lukluk gut na givim tingting long ol askim bilong ol.

- Ol meri insait long PNG i stap wantaim pret bikos long ol raskol pasin we i save bagarapim laip na sindaun bilong ol. Ol i askim gavman nau long mekim strongpela egensim ol raskol pasin we i kamap long ol meri.



**SLAM DUNK NA WIN!**

**5 BIKPELA MILO SPOTS PACKS BILONG WINIM!**

**Nestlé MILO**

WANTAIM: BASKETBALL BACKBOD, MILO SPOTS BAG, MILO BASKETBALL, MILO T-SHIRT, WARA BOTOL NA KEP, NA K100 KES MONI!

**PLIS RIPO**

**Mosbi:**

Ol bin bagarapim tripela meri na wanpela man i bin dai long Mosbi long las wiken.

Plis komanda long Nesenel Kapitel John Marru i tok ol bin bagarapim wanpela meri long Shady rest Hotel taim em i opim dua long wanpela man i go nok long dua bilong em long 8 kilok moning.

Narapela pasin bilong bagarapim meri i bin kamap long Sande moning taim teks i lusim wanpela meri long Hohola klostu long Poreporena Friwe. Taim meri i go aut, wanpela man i pulim em i go long fil klostu long Elkom hetkota na bagarapim em. Tupela arapela poroman bilong man tu i bin bagarapim meri ya

Narapela wankain pasin i bin kamap long Koki taim wanpela yangpela meri i wokabout i go long lusim ol samting bilong em long narapela haus. Tasol wanpela man i holim em long rot na bagarapim em.

• Wanpela ronawe kalabus man long Bomana haus kalabus i dai long dispela wik bihain long wanpela sutaut wantaim plis.

Plis ripot i tokaut long nem bilong daiman olsem Henry Laiam Manai husat i gat 29 krismas na em i bilong ples Oroip long Tapini insait long Sentrel provins.

Manai i bin stap long kalabus long nainpela krismas long wokim stil pasin na em i wanpela strongpela kriminel.

Bos bilong ol plis long Nesenel Kapitel Distrik na Sentrel provins Raphael Huafolo i tok plis i no bin save olsem Manai i wanpela ronawe kalabus lain taim ol bin lukim em wantaim ol arapela lain klostu long yunivesiti. Na em i sut long ol wantaim wanpela raifol.

Plis i amamas wantaim helpim bilong komyuniti long painim ol ronawe kalabus lain tasol em no amamas long Manai i dai olsem. Em bin laikim Manai long givim em yet i go long han bilong plis.

Mista Huafolo i laikim ol narapela 24 kriminel long givim ol yet long han bilong plis bikos ol no inap long ronawe i go long longpela taim.

Manai em namba tu ronawe kalabus man long ol plis long kisim. Narapela 24 i ronawe hait yet.

**Is Sepik:**

Wanpela man i dai na tripela haus i paia bihainim wanpela trabel long Is Sepik long las wiken.

Provinsel Plis Komanda bilong Is Sepik Leo Kabilo i tok bihainim wanpeal pait klostu long Yot Klab las wiken, wanpela mangki Drekkir i dai.

Ol yangpela i bin pait na o, i sutim wanpela wantaim wanpela sap samting na mangki ya i dai.

Inspekta Kabilo i tok mangki ya i bin dai taim ol i karim em i go long Boram haus sik.

Inspekta Kabilo i tok neks de, ol hauslain bilong dai mangki i go long dispela haus klostu long Yut Klab na ol i kukim bikos ol i saspek long man i sutim dai wanlain bilong ol i stap long haus ya.

Plis i kisim tripela saspek pinis na ol i wok long painim yet narapela. Na ol i askim ol lain i stap insait long dispela trabel long noken kisim lo i go long han bilong ol.

# Kot odaim rikaun long Namatanai Open vot

**VERONICA HATUTASI i raitim**

NESENEL Kot long dispela wik i odaim llektorel Komisnin long kaunim gen ol 1997 vot pepa bilong Namatanai Open insait long Nu Ailan provins.

Dispela i bihainim ileksen petisen bilong foma Praim Minista na memba bilong Namatanai Open Sir Julius Chan husat i bin lusim sia i go long nau memba Ephraim Apelis long 1997 Nesenel lleksen. Mak we Sir Julius i bin lus em long 110 poin tasol.

llektorel Komisnin opis i tok ol no makim yet de bilong holim rikaun tasol ol loya i stretim yet ol samting wantaim kot long dispela samting.

Opis i tok wanem taim jas i givim toktok long dispela samting i go het, ol bai kari-maut rikaun.

Jastis Kubulam Los long dispela wik Tunde i bin harim kot long ileksen petisen bilong Sir Julius we em bin mekim long las yia egensim nau memba Mista Apelis.

Sir Julius i bin putim ileksen petisen bikos em bin tok i gat wok hait long autim em long wok bilong em olsem provinsel na nesenel politisen.

Long petisen em bin tok tu olsem bikos long dispela wok hait, planti long ol sapota bilong em i no bin vot na tu, ol bin pulim vot bilong ol anda ej o krismas bilong ol i no inap yet long vot long sapotim Mista Apelis.

Sir Jastis Los i bin glasim na skelim

faivpela toktok bilong Sir Julius na rausim tupela long en long kot bilong dispela wik. Long las yia, petisen bilong Sir Julius i bin gat 60 as toktok (allegations)-egens long en tasol kot i bin rausim 55 na lusim faivpela tasol. Na em bin lukluk long dispela faivpela long dispela wik. Kot i bin rausim planti bilong ol toktok ya bikos ol nogat as o witnes long ol.

Tripela toktok we Sir Jastis Los i bin skelim na i gat gutpela as long ol na givim disisen long rikaun i mas kamap em long:

• Ol rausim ol waslain sapota (skrutinia) bilong Sir Julius long ples bilong holim vot bikos i gat evidens olsem dispela i bin kamap na i brukim lo;

• Pasin i no stret long taim bilong kaunim ol vot i bin kamap na evidens long dispela i kamap na;

• Na ol bin larim ol yangpela we krismas bilong ol i no inap 18 yias long vot bilong pulim sapot. Dispela i gat ol samting i soim olsem em i kamap.

Sir Jastis Los i tok bihainim ol dispela samting, i mas gat rikaun.

Em bin tok em bin kisim planti toktok olsem nogat rikaun i mas kamap inap sapos ol samting i bagarapim ol risal bilong vot. Dispela i kamap na em i odaim llektorel Komisnin long holim gen rikaun long ol vot pepa bilong Namatanai Open.

Sir Julius i no bin amamas tumas long disisen bilong kot. Wanem samting em i laikim em long holim bai ileksen na givim sans long ol dispela sapota husat i no bin vot long vot.

Wankain tu long Mista Apelis.

Loya bilong em Camilus Narokobi i tok ol bai skelim na glasim disisen na sapos olsem wanem, ol bai karim samting i go long Suprim Kot.



• Spika Bernard Narokobi na Gavana Arthur Somare i welkam long senses insait long Is Sepik provins.

## Clough Niugini winim K407 milien rifaineri kontrak

CLOUGH Niugini em han bilong Enjiniaring na Konstraksen kampani bilong Australia Clough Enjiniaring Limitiit i winim K407 milien (US\$155 milien) kontrak long bilding namba wan hap bilong Motukea Oil Rifaineri long Napapa, Pot Mosbi.

Dispela em namba wan fektori bilong wokim oil insait long kantri.

Kampani InterOil i tokaut

long dispela samting bihain long Ovasis Praivet Invesmen Koporesen (OPIC) i apruvim US85 milien long projek i go het. Clough i garantim tu olsem em bai pinisim projek olsem hap long kontrak agrimen.

Siaman bilong InterOil Phil Mullacek i tok dispela em i bikpela samting long rot bilong kamapim oil fektori insait long kantri.

Em i tok InterOil i bin wok gut

wantaim Clough long las tupela krismas na ol i kamapim ol gutpela wok wantaim.

Em i bilip tu olsem wantaim ekspirians bilong em ovasis na long PNG tu bai i bildim fektori we bai bungim stended bilong tude na i resis wantaim maket bilong tude.

Projek ya bai pulim 180 wokman long Motukea yet na 740 long opis na ausait.

## Oposisen i no sapotim praivetaisesen

OPOSISEN lida Bill Skate i tokaut olsem Oposisen i no inap long sapotim dispela praivetaisesen bil we Gavman bilong Sir Mekere Morauta i subim het long pasim.

Mista Skate i tok i tru olgeta pipel bilong PNG na long arapela kantri i gat rait long baim ol gavman bisnis tasol askim i go olsem:

'Ol i kisim mani long wanem hap, olsem wanem long baim ol gavman bisnis?'

## Sir Maino go pas long sekim NPF

**I kam long pes 1**

kamap. Sapos (sapos ol inap long mekim) wanem kain rot bai ol i bihainim long kisim bek ol samting i gat bikpela veliu long ol we i lus pinis; na

• Sapos aninit long dispela ekt o arapela ekt, wanem dispela gavman ejensi, olsem Dipatmen bilong Fainens na Tresi, Odita Jenerel na Dipatmen bilong Leba na Emploimen, i no mekim wok bilong ol long bihainim lo, lukautim o givim ripot bilong wok bilong ol na bikpela bilong dispela asua.

Sir Mekere i tok astingting bilong dispela Komisnin bilong Inkwairi em long painim aut wanem samting i kamap long mani bilong ol memba bilong NPF na i no bilong kamapim wanpela panisim bilong

ol rong long husat man o meri o ogenaisesen dispela Inkwairi i painim olsem ol i brukim lo.

Em i tok pasin bilong panisim ol lain Komisnin i painim ol i brukim lo em i stap long han bilong ol arapela lain long mekim.

Sir Mekere i tok sapos NPF Komisnin bilong Inkwairi i painim aut olsem sampela lain i brukim lidasip kod, orait em samting bilong Ombudsmen Komisnin long glasim.

"Sapos ol i brukim kriminel kod, orait em i wok bilong Plis long glasim na sasim ol. Sapos i gat gutpela asua insait long sivil eksen, orait em samting bilong wan wan pipel bilong PNG na ol ogenaisesen long glasim na kot long en. Olgeta dispela rot

bai op long husat i laik bihainim, bihain long Komisnin bilong Inkwairi i pinisim wok bilong em," Sir Mekere i tok.

Dispela Komisnin bilong Inkwairi i kamap bikos las mun Jenerel menesa bilong NPF Rod Mitchel i tokaut olsem NPF bai kisim eksen long katim mani bilong 200,000 memba bilong NPF long namel o 50 pesen (%).

Dispela hevi i bin kamap taim NPF i sot tru long mani long we em i save wok long en, K240 milien i pundaun kam daun long K120 milien.

Long dispela wik Kot i stapim NPF long katim 50 pesen mani bilong ol memba bilong en bihain long sampela memba bilong NPF i kotim NPF. Dispela hevi nau i stap yet long han bilong kot.

**WANTOK**

All departments. Phone: 325 2500 - Fax: 325 2579  
P. O. Box 1982, Boroko, NCD, Papua New Guinea



Publishing Weekly, Thursday, for  
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

General Manager and Group Editor in Chief:  
Anna Solomon.  
Advertising Manager:

Papers distributed by air throughout PNG. Available by air mail subscription within Papua New Guinea and overseas  
Email address:  
word@global.net.pg

Editor of Wantok:  
Yakam Kelo.

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Palamen ripot wantaim WENCESLAUS MAGUN

Gavman bai kamapim lo bilong NPF na POSF

PRAIM Minista Sir Mekere Morauta i bin tokim Palamen aste olsem em bai tokim Palamen long wanem ol senis Gavman bilong em bai mekim insait long ol lo bilong NPF na POSF taim Palamen i bung long Jun.

"Mi bai tokaut long wanem ol arapela eksem olsem senisim ol lo bilong NPF na POSF insait long narapela kibung bilong Palamen. Dispela em i no samt-ing mi mekim bikos long hevi bilong NPF tasol hap wok bilong Gavman long kamapim rifom na plen bilong pravitaisesen," Sir Mekere i tok.

Em i tok kamapim lo na givim pawa long supanuesen long mekim independen wok em i wanpela rot tasol bilong go het. Em i tok dispela bai stapim gavman long suvim nus i go insait na daunim paul pasin na pasin bilong i no mekim gut wok.

Sir Mekere i tok tu olsem straksa bilong baim pensen pe long ol memba bilong ol institusen tu em i bilong gut taim na olsem i mas gat sampela bikpela senis i kamap.

Em i tok long dispela as i mas gat bikpela wok long glasim na stretim olgeta straksa bilong ol pensen pe bilong ol wok manmeri. Em i tok planti ol arapela ogenaisesen i no save baim gut pinis pe bilong ol wok manmeri bilong ol bihainim intanesenel stendet.

Oposisen sapatim Gavman long sekim NPF

OPOSISEN lida Bill Skate i tok ol i givim olgeta sapat bilong ol i go long Praim Minista Sir Mekere Morauta na Gavman bilong em long kamapim Komisen bilong Inkwaيري long sekim Nesenel Providen Fan.

Em i tok tu olsem em i redi long givim olgeta sapat bilong em long kamapim wanpela rifom program long ristraksa bilong NPF i go insait long kamapim wanpela institusen we i nogat paul pasin, na i ken mekim gut wok oltaim, i no bilong kantri tasol bilong ol memba bilong NPF tu na ol arapela pipel bilong PNG.

Mista Skate i tok tingting ol Bod bilong Menesmen bilong NPF i mekim long rausim hap o 50 pesen (%) mani bilong ol mani ol memba bilong NPF i putim i go insait long NPF we ol i ken kisim taim ol i pinis long wok em i no gutpela na i sindaun

long boda mak bilong brukim lo.

Mista Skate i askim tu Bod na Menesmen bilong NPF long glasim bek gen disisen ol i mekim.

"Mi no bilip olsem dispela em i wanpela we tasol bilong stretim dispela hevi," Mista Skate i tok.

Em i tok wanpela arapela rot bilong stretim dispela rot em bilong putim mani i go insait long inap mani NPF nau i sot long en.

Mista Skate i tok dispela hevi em wanpela hevi bilong kantri na olsem olgeta lida i mas givim olgeta sapat bilong ol long en.

Em i tok Gavman i gat bikpela dinau long NPF mani na i tru Gavman bilong Sir Mekere/Zeming i no gat asua long dispela, tasol dispela gavman i gat wok long stretim dispela hevi kwik.

Skate bin statim wok bilong sekim NPF

OPOSISEN lida Bill Skate i tokim Palamen aste olsem taim em i bin stap praim minista em i bin makim Henry Fabila olsem nupela Menesing Dairekta bilong NPF na tokim NPF Bod na Menesmen long karim aut wanpela wok painim i go insait long ol disisen ol olpela bod na menesmen memba i bin mekim.

Mista Skate i tok astingting bilong dispela oda em bilong sekim nogut pasin nogut i bin kamap long investim mani bilong NPF. Na tu long kisim bek ol mani i lus pinis na kotim ol lain i, gat asua long brukim lo.

Em i tok dispela oda i bin kamap na olsem long Februari 1999 i bin gat wanpela bikpela 30 pes ripot i kamap.

Mista Skate i tok Price Waterhouse i bin mekim dispela ripot na i kamapim ol dispela tingting olsem:

- Bekim bek K6.5 milien dinau NPF i gat wantaim PNGBC;
- Painim moa mani long pinisim NPF Tawa long mak bilong K5 o K10 milien.
- NPF i ken painim mani long dispela ol rot:
- Painim moa mani long sotpela taim;
- Skruim taim bilong painim moa mani long sotpela taim;
- Salim ol ekwiti;
- Salim ol interes insait long NPF Tawa;
- Bekim bek dinau bilong NIC kwik.

Ol rot bilong painim dispela mani olsem:

- Bihainim pasin PNGBC i laikim na mekim wanem ol senis we inap long mekim;
- Pinisim wok bilong NPF tawa; na
- Lukautim wanpela risev mani na ekwiti long menesim ANZ dinau;
- Mista Skate i tok Price Waterhouse i askim tu NPF long kamapim plen bilong namel taim na longpela taim invesmen.
- Em i tok Price Waterhouse i bin askim NPF long glasim tu ol arapela rot olsem:
- Sekim gen wok bilong Fainens na Invesmen Menesa bipo long kisim ol wok manmeri bilong dispela posisen;
- Bod i mas sekim gen ol polisi bilong lukautim mani bilong NPF na tingim gut ekwiti akaunting na mani insait long Beng bilong Hawaii;
- Long wok bilong NPF long 1998, Bod i mas sekim gen polisi bilong lukautim mani bilong NPF, glasim draf fainensel ripot long pinis bilong 31 Desemba 1997 bipo long sainim menesmen dikleresen;
- Bod i mas sekim wok bilong lukautim mani na stretim wanem ol eria we i no gutpela;
- Bod i mas sekim rait na wok bilong em insait long Interes Withholding Takis na Valiu Added Takis; na
- Bod i mas lukaut gut olsem bai NPF i redi long wanem ol senis i kamap long supanuesen indastri.



TOKSAVE

OL wokmanmeri bilong 2000 Nesenel Senses i hatim stret wok bilong stretim senses na ol bikpela bos bilong ol i go lukim ol nau long glasim gut wok bilong ol.

Aste tasol, bos bilong senses Mr John Kalamoroh i go long Lae long glasim wok insait long Mamose na i bin go bek long Pot Mosbi long apinun.

Long Buka, senses mausman bilong Australian Gavman Mista Reg Gilbert na Asisten Direkta bilong Senses Oporeisen Mista Alohai Pochapon i wok long glasim senses wok insait long Bougainville.

Mista Gilbert i bin wok long Papua Niugini bipo olsem direkta bilong 1980 Nesenel Senses na bihain em i bin go bek long Australia long yia 1981.

Em i tok olsem Australia bai i givim bikpela mani long mekim wok bilong senses long Bougainville long ribildim o kirapim ken ples Bougainville.

Senses em i wok bilong kauntim ol pipel long kisim save long gutpela wei bilong plenim developmen.

Ples Bougainville i bin bagarap taim ol asples Bougainville i bin pait long lusim Papua Niugini na kamap independen.

Mista Gilbert na Mista Pochapon i bin i go long Buka long Tunde bilong dispela wik na bai tupela i go bek long Pot Mosbi tete.

Long Buka, tupela i bin bung wantaim Bougainville Senses Stiaring Komiti.

Long wik i go pinis, bos bilong Bougainville senses Misis Hijaly Kele i tok olsem senses wok long sentrel Bougainville i no go het gut bikos ol senses wokmanmeri i poret long ol BRA.

Senses Direkta Mista Kalamoroh i tok aste olsem em wantaim ol narapela bos bilong senses long Pot Mosbi i stretim pinis rot bilong lukautim ol senses wokmanmeri long sentral Bougainville.

Misis Kele em i wanpela meri tasol husat i wok olsem provinsel senses kodineita na ol wanwok bilong em i bin amamas tru taim ol i bungim em long wik i go pinis long Kimbe.

Olgeta provinsel senses bos bilong Niugini Ailans rijen i bin bung long Kimbe long skelim wok bilong stretim senses long mun Julai.

Long Lae, ol provinsel senses bos bilong Mamose i bung aste long skelim wok bilong ol.


Miting bilong ol bai i pinis long Fraide.

Tripela bikpela senses bos bilong Pot Mosbi Mista Bernard Kiele, Mista Boe Douna na Mista Raphael Sari i stap wantaim ol long Lae long glasim wok bilong ol.

Mista Kiele em i namba tu direkta bilong senses, Mista Douna em i nesenel senses kodineita na Mista Sari em i bos bilong senses insait long Mamose.

Ol tripela bai i go bek long Pot Mosbi long dispela Sarere.

Gavman bilong Papua Niugini na Gavman bilong Australia i sapatim 2000 Nesenel Senses.



• Selebretim Jubili 2000 long ples Parua Katoik misin wantaim balun em Witney Justin. Ol pipel long dispela Yangomugl distrik i selebretim Jubili 2000 wantaim bikpela amamas. Foto: Sape Metta.

**TORO**

MERI BILONG TORO GO LONG HAUSIK LONG KARIM BEIBI...  
WEEYUU WEEYUU

AMBULANS AMBULANS

TORO AMAMAS TRU NA EM I GO SPAK LONG SELEBRETIM BEIBI...  
YURING NA PAI NIMALUT  
MERI BLO MI BAI KARIM... EM BOI TEO!

NAU EM RING IGO LONG SEKIM SAPOS MERI IKARIM BOI...  
HAROU... Hic! IS TAT PEIPI FAKTRIK!  
YES, EM HAUS KARIM LEBE WOD!

(HIC!) IS MAI WAHF PON YET?...  
YES BI KARIM PINIS!  
IS IT POIS O KEVS?  
EM KARIM GEL YA.  
OH-NO, K-AVE! BED SHOT!

# NIUGINI AILAN NIUS

## Is na Wes Nu Briten redi long holim bai ileksen


**VERONICA HATUTASI i raitim**

Is Na Wes Nu Briten i redi long wokim bai ileksen long mun Jun long tupela memba bilong ol husat i lusim sia.

Gavana Jenerel Sir Silas Atopare i sainim pinis ol pepa we i tok oraitim bai ileksen bilong Gesel open long Is Nu Briten na Rijnel sia long Wes Nu Briten long kamap bihain long (Gesel) memba Nakikus Konga i bin risain las wik na Wes Nu Briten rijnel memba Bernard Vogae i bin dai long mun Februari long dispela yia.

Ilektorel opis long Rabaul i tok ol kendidet husat i laik sanap resis long tupela sia i mas givim nem bilong ol long dispela wik. Na vot long ol ilektoret bai stat long Jun 3 inap long namba 17. Ol bai kisim olgeta pepa i go bek long ilektorel opis long Jun 23.

Ilektorel opis long Wes Nu Briten i tok ol wok i go gut tasol na ol sampela kendidet husat i laik resis i wok long bung wantaim ol komiti bilong ol. Tupela man i rejistaim nem bilong ol pinis long sanap resis. Em long



• Nakikus Konga

Urban Giru foma Kopra Maketing Bod memba na bisnis man Joe Tauvasa.

Long sia bilong Gesel open, ol wok redi i go gut na tupela man i rejistaim nem bilong ol tu. Em

long Vincent ToLimana na Ereman ToMete.

Ol ripot i tok ples i stap isi bikos ol pipel i bin kirap nogut long taim Mista Konga i risain na ol i stap yet long sok.

## Ol LLG presiden mas wokim fainensel disisen

**WALTER DARIUS i raitim**

WANPELA Provinsel politisen i laikim bai ol presiden bilong ol Lokol Level Gavman (LLG) i mas stap insait long ol toktok na disisen bilong rot we provins i yusim mani long em. Dispela em long stapim pasin bilong paulim mani we ol LLG kuskus na ol asisten kodineta i save wokim.

Presiden bilong Lassul Baining LLG Henry Saminga i bin wokim dispela toktok taim em i tok amamas long Provinsel Plis Komanda Superintenden Ephraim Tomonmon long sanap strong egensim ol kriminal wok we i sut long paulim mani na bagarapim ol gavman sevis i go long ol pipel.

Mista Saminga i tok edvaisa bilong LLG i mas kamapim polisi bilong senisim LLG long mekim ol presiden i sainim hanmak (signesa) bilong ol

long kisim mani bilong ol wok we ol wan wan eria i wokim.

Em i tok dispela i gutpela bikos em bai soim long ples klia rot we ol i yusim LLG mani long en na ol arapela samting moa we i save kamap long paulim pablik mani long en. Tasol em i tok ol presiden i noken mas bikmaus na fos long rot bilong yusim mani long en na tu givim nating mani long ol pren na hauslain bilong ol tasol.

Em i tok aninit long nupela gavman rifom, ol LLG i wok long holim na yusim bikpela mani. Na ol mas yusim gut long karimaut wok bilong givim sevis i go long ol pipel

Mista Saminga i tok long ol yia i go pinis, tok i save sut long ol politisen long paulim pablik mani Na maski dispela i no kamap yet long Is Nu Briten long provinsel gavman level, ol mas noken larim dispela i kamap long ol pablik sevan long LLG level.



• Stail bilong ol yangpela wokmeri bilong Babasait Hotel long Lorengau, Manus.

## Man Ahus kilim meri bilong em

WANPELA Ahus Ailan man i stap nau long plis sel long Lorengau binainim dai bilong meri bilong em.

Nem bilong dai meri em Joyce Banas husat i gat 35 krismas na em i bilong Nihon Ailan long wes kos Manus. Na nem bilong man em Christopher Sale husat i gat 25 krismas na em i bilong Ahus Ailan

Manus Provinsal Plis Komanda Inspekta Benedict Bensir i tok Lorengau plis i sasim man long kilim dai meri bilong

em na em i stap long plis sel wetim kot. Em i tok birua i kamap bihain long tupela marit bilong ples Lugos i kros pait namel long ol yet long las Sande.

Em i tok man i bin lusim haus long go lotu na em i wokabout inap long Wara Lugos taim meri wantaim belkros i bihainim em. Na meri i sutim man long baksait wantaim ston. Long namba tu taim meri i sutim gen man, man i belhat na i kirap na ronim meri daunbilo long liklik maunten. Em i holim na sut long em i go long

wara na meri i dai kwiktaim tasol.

Inspekta Bensir i tok man i luk-save olsem meri i dai na em i pret na go toksave long ol pleslain na ol binripotim dispela samting i go long plis. Plis i bin go na kisim bodi i go long Manus haus sik na nau enm i stap long aisbokus we ol save putim ol dai man long en.

Inspekta Bensir i tok ol dokta i no sekim bodi yet long tokaut long as bilong dai bilong meri ya.

**Biabia**

BIABIA RAUN I GO LONG RAINBOW ESTATE LONG LUKIM OL PORO BILONG EM LONG HAP...

MI GO LUKIM JOE LONG RAINBOW...

BAGA INO SAVE OLSEM OL ROT LONG HAP I BAGARAP NA PLANTI POT-HOL TUMAS...

WELKAM TO RAINBOW

EM KUKIM EKSPENSIV KAR I GO INSAIT...

VROOONN!!

HE! HE! HE! BAI MI SOIM OL RAINBOW HUSAT EM KING OF DA ROD!

BAGA KKM TAIM.. TAA ROD I KAMAUT SIVI JOIN I KAMAUT, SPRING I BRUK..

HAAA!! MAI KAARR!!

HAI HA! HA! YU GAT MOA?

TOU TRAK IKAM NA KARIM KAR I GO...

## Manus gavman helpim Bipi Ailan

OPIS bilong Manus Gavana Stephen Pokawin i givim sampela helpim long ol pipel bilong Bipi Ailan we bikpela solwara i bin bagarap ol haus bilong ol tupela wik i go pinis.

Opis i salim pinis tripela dram bilong petrol na ol arapela samting bilong helpim ol pipel i bildim bek ol haus we bikpela solwara i bin karim long dispela taim.

Ol ripot i tok wanpela mini sunami i bin kamap long ol ples olsem Maso, Matahai na Salapai insait long Bipi Ailan long Manus provins tupela wik na bagarapim sampela haus wantaim tu ol arapela samting bilong ol pipel. Tasol nogat man i bin dai long en.

Ripot i tok tripela bikpela taidel wev i bin karamapim tripela ples ya long Fraide nait Mas 24, Sarere Mas 25 na Sande Mas 26.

Ripot i tok taim namba wan bikpela solwara i bin kamap, ol pipel i bin harim bikpela pairap olsem bom i pairap.

Ripot i tok kwiktaim bihain long dispela, solwara i solap na em i karim i go ol liklik haus i sanap long nambis tasol laik na nogat man, meri o pikinini i kisim bagarap.

Ripot i tok taim ol ples lain i lukim dispela samting i kamap, ol i pret na lusim ples na ronawe i go long long-we ples bilong abrusim birua.

Taim namba tu bikpela solwara i kamap gen, ol komyniti lida i tokim ol pipel long redim ol yet na helpim ol arapela lapun na sik lain bilong lusim

plis i go long ol seif eria.

Bipi Ailan i gat 1,000 pipel long en na i stap 100 kilomita longwe long Lorengau taun. Em i nogat telipon na i nogat gutpela rot bilong salim ol tok-tok i go na i kam long ailan. Em i save yusim Katolik Misin VHF radio tasol na olsem taim birua i kamap, em bin hat tru long ol pipel long ripotim samting i go long ol disasta na gavman atoriti long Lorengau.


Ripot i tok bikpela solwara i bin karim tripela haus i go long solwara na sevenpela arapela i bin kisim bagarap. Solwara i bin karim planti samting bilong ol pipel i go long bik-solwara.

Ripot i tok samting ya i binrausim bikpela hap graun namel long ples Maso, Matahai na Salapai.


Ol lain long opis bilong gavana husat i bin go long ailan bilong kisim ripot i bin bung wantaim ol ples lida na pleslain na toktok long dispela samting. Bikpela samting ol i laikim em long putim imejensi telipon long ailan, putim masin bilong monitaim ol bikpela solwara, apgretim VHF radio bilong Katolik Misin stesen.

Opis bilong Ekting Gavana Francis Posanau i tok em bai helpim gavman long kamapim sampela polisi na progrem long helpim ol pipel bilong ol nambis ples we dispela hevi i ken kamap long ol.

Opis i tok ol wok redi i stat pinis long kamapim sabmisen bilong disasta plen na progrem bilong Manus provins bihainim dispela hevi.



# SEPIK NIUS



## Gavman sainim OK Tedi kontrak wantaim ol Telefomin


MINISTA bilong Pablik Sevis Philemon Embel i sainim kontrak bilong Telefomin Distrik Developmen Agrimen las wik long Palamen wantaim Gavana bilong Sandaun Provins John Tekwie long givim K1 milien i go long ol pipel bilong Min wanpisin insait long Telefomin distrik.

Dispela mani em Ok Tedi main i save givim i go long Nesenel Gavman na aninit long dispela kontrak sapos gavman i gat inap mani, em i ken givim samting olsem K1 milien long wan wan yia i go long ol pipel bilong Min wan-

pinis insait long Telefomin Distrik long wanem ol i gat hap graun long main eria.

Gavana Tekwie i askim Gavman long stretim dispela wok na i noken sainim tasol pepa na lus tingting long ol pipel bilong em. Em i tok Telefomin distrik em wanpela distrik long provins na long PNG we i nogat ol gutpela sevis olsem rot, bris na ples balus samting na sosel sevis na wantaim kain mani Gavman i givim, ol i ken yusim long stretim sindaun bilong ol.

Memba bilong Telefomin Robert Sakias i tok long dispela yia ol i bin



• Robert Sakias

kisim tasol K200,000 tasol dispela mani em i no inap.

Em i askim tu Gavman long mekim bek pe long ol arapela mani aninit long dispela kontrak i go bek long 1998 taim OK Tedi main i statim dispela kontrak. Long dispeal taim Gavman i bin sainim kontrak bilong givim K1.8 milien tasol i givim ol K300,000 tasol.

Wantaim dispela mani Mista Sakias i tok em i bin baim ol meterial bilong wokim 12-pela haus bilong ol pablik sevans long distrik bilong em tasol bikos ol i no kisim inap mani ol i no pinisim dispela

projek na ol dispela meterial nau sting long Vanimo ples balus i stap.

Em i tok tu olsem ol pipel bilong Min Wanpisin i no save kisim sampela sevis insait long 'tax credit scheme' we Gavman i save givim long ol risos kampani long grisim ol long kam mekim bisnis long kantri.

Mista Sakias i tok sapos Gavman i onaim dispela agrimen ol i mekim las wik, em i gat tingting long mekim 59 kilomita rot long Kopiago i go olgeta long Telefomin.

## Gavman i no makim edministreta bilong Sandaun yet

GAVANA bilong Sandaun Provins John Tekwie i laik save wanem as Gavman i no makim edministreta bilong provins bilong em.

Em askim Minista bilong Pablik Sevis Philemon Embel long tokaut klia wanem as tru Nesenel Gavman i no makim wanpela edministreta bilong provins bilong em.


Em i tok ekting edministreta bilong provins bilong em i bin wokim wok aninit long dispela posisen inap long 14 mun olgeta na yet Gavman i no makim wanpela ful taim edministreta.

Em i tok Sandaun Provins Gavman i mekim olgeta samting bihainim ol lo na rot bilong makim edministreta tasol i kam inap nau ol i no kisim wanpela gutpela bekim.

Mista Embel i tok em i no klia long wanem as Gavman i no luk-save long dispela na i larim dis-

pela hevi long stap yet. Tasol em i tok em bai lukluk long dispela na stretim dispela hevi.

Em i tok Dipatmen bilong em bai traime long makim fultaim edministreta bilong Madang, Sentrel, Is Niu Briten, Oro, Sandaun, Westen na Milen Be provins.



• John Tekwie

## Tekwie i no brukim kot oda

GAVANA bilong Sandaun John Tekwie i tok em i no brukim kot oda olsem nius ripot i bin tokaut tupela wik i go pinis.

"Mi laik tok klia long olgeta pipel bilong Sandaun long stretim wanpela ripot i bin kamap long tu wik i go pinis, long Wantok nius olsem

"Tekwie brukim Kot oda", em i tok.

Gavana Tekwie i tok em ino tru olsem em i gat sampela dinau long Felix Manroc long ol kakaruk bilong em.

"Dispela dinau long K1000 long kakaruk em mi baim pinis wantaim

K1500," Mista Tekwie i tok.

Em i tok ol arapela samting em yet bai stretim wantaim Mista Manroc. Em i tok tu olsem dispela hevi i stap long han bilong Kot olsem na em bai larim Kot yet i ken stretim.

## Tok sori long Mista Kumbakor

Memba bilong Nuku na Minista bilong CIS Andrew Kumbakor i tokaut klia olsem olsem dispela K71,600 plis i sasim em long en, em mani bilong em aninit long ol alawens we ol memba na Minista i mas kisim inap long 2002 neks ileksen.

Mista Kumbakor i tok dispela mani em alawens bilong em stret olsem long trenspo, skul fi, entateinmen na arapela moa we ol minista i save kisim.

Mista Kumbakor i tok dispela mani i no mani bilong Rurel Developmen Fan o Diskresen fan. Olgeta dispela mani i gat rot na sistem bilong en wantaim Distrik Plening na Baset Praioriti Komiti na rekot i stap wantaim Provinsal Tresera long Vanimo.Fainens opis.

Wantok Niuspepa i laik tok sori long memba bilong Nuku na CIS Minista Andrew Kumbakor long raitim stori long las wik we i tok em i kisim sas long paulim moa long

K70,000 bilong ilektoret.

Wantok niuspepa i tok sori long memba na Minista, Mista Kumbakor long wanem bagarap na nem nogut i kamap long em long dispela ripot. Aninit em dispela stori we i bin kamap las wik we opis na loya bilong Mista Kumbakor i tok i no tru na i krangki. Ful tok klia bilong Mista Kumbakor i stap long pes 28.

## Kumbakor kisim sas long paulim mani

NESENEL memba bilong Nuku Andrew Kumbakor i kamap long ai bilong Kot long sas bilong paulim mani bilong ilektoret. Dispela mani em Rurel Developmen Fan (EDF) mani bilong ol pipel long kirapim ol projek na sevis insait long ilektoret.

Plis i sasim Mista Kumbakor long las wik na em i baim beil long K500 na stap ausait wetim kot bilong em long dispela wik. Tasol Kot i surukim taim bilong kot i go moa long neks mun Mei 3.

Wok painimaut i soim olsem em i bin yusim moa long K70,000 bilong ilektoret long ol samting we dispela EDF mani i no ken go long en.

Tasol Mista Kumbakor i tok em bai salensim dispela ripot long kliaim gut nem bilong em bikos em i bilip sampela politiks i mekim dispela pasin long daunim em. Em i bilip dispela sas em i kisim i wok bilong pasin politiks tasol long daunim em. Olsem na em bai pait long mekim klia gut nem bilong em.

## Tupela skul i op long sunami eria

### ADAM ELLIOTT i raitim

TUPELA nupela skul i bin op long sunami eria long dispela wik.

Em long Amu naRainikir komyuniti skul. Ol i kamap olsem namba fo na faiv skul i op long sunami eria.

Daiosis bilong Aitape Rihabilitesen Komiti i bin sanapim sevenpela nupela skul long wes kos bilong Aitape aninit long program bilong em.

Ol nupela skul long Areki, Arop na Aipokon i op pinis. Taim Amu na Rainikir i op, ol skul long Olbrum na Barapu i stap pas yet tasol ol atori-

ti i bilip strong olsem ol tu bai op long mun Me.

Ol pipel bilong Amu i bin amamas long opim Sen Michael's Komyuniti skul long dispela wik bikos dispela i givim sans long ol pikinini long go skul bek gen. Skul i gat tripela dabel klasrum na siksipela haus tisa long en. I gat tu wanpela etpos na haus slip bilong ol etpos woklain long Amu.

Bikos long hevi long ol rot i bagarap, ol wok long ribildim skul na ol haus i no bin pinis kwik. Olsem na em bin kisim eitpela mun long pinisim ol wok.Rainikir komyu-

niti bai opim Sen Gabriel's komyuniti skul long tumora.


Skul i gat long er tripela dabel klasrum na siksipela haus tisa. Na em bin kisim eitpela mun tu long sanapim ol bilding long skul ya.

Wara Yalingi i save tait na kamapim hevi long rot bilong ASmu na Rainikir pipel. I nogat bris long dispela wara.

Maski ol hevi i stap, ol pipel bilong Amu na Rainikir i strong na ol i wok hat long ribildim komyuniti bilong ol bek. Na ol kaikai bilong hatwok em ol i lukim nau taim tupela skul long ples bilong ol i op.

**Morobeen**  
**BEEF CRACKERS**  
IGAT kick!

**HEPI BIRTHDAY**  
**25% MORE**  
5 BISKETS INSIDE-? FREE



# Ol Koiari stretim toktok long Kokoda Treil

## KENNEDY EDENE i raitim

TOKTOK nau kamap pinis namel long ol komyuniti viles na ol papa-graun wantaim ol lokol tua operetas long stretim na traime na stapim raskol pasin wok long kamap long Kokoda Treil.

Namba wan raun bilong toktok em kamap pinis las tupela wik samting na bai i gat sampela moa toktok bai kamap.

Mausman na man husat i go pas long dispela toktok Mista Kevin Anapa wantaim narapela lokol tua

opereta bilong Koiari Tua, ol tok tupela i amamas tru long kamap bilong miting las wik bihain long tupela i miting pastaim i bin abrus. Mista Anopa tok, i gat liklik hevi em stap long ol man em ol stretim pinis.

Em i tok bikpeal wari ol raskol save laik bagarapim ol tua operesins na holim ol trekas na turis em bikos ol yut na ol asples ol gat belhevi wantaim ol tua operetas.

Bikos ol no save stap insait long tua operesins na wok wantaim ol Kokoda Treil Developmen wok.

Lokol lida Mista Vanire Niani na John Yobu Oive autim wari bilong ol na tok sapos yupela ol tua operetas i no yusim ol ples lain na ol yut, em bai nogut na bai i gat pasin nogut bai stap yet.

Pasin stil na hensapim ol turis bai no inap pinis.

Na bai yumi save husat wok long wokim dispela pasin raskol olsem.

Bai ol man ausait kam na mekim trabel na ronawe o sampela yut bilong yumi, hau bai yumi save.

Gutpela pasin em yupela na mipela nau mas stretim tok na wok wantaim, lida ya i tok.

Long toktok bilong ol ples lain, Mista Anapa na Mista Narai Billy ol tok orait na toksave bai ol bungim ol insait long wok bilong ol.

Tasol wok bai i no inap stat hari-ap, wari ol mas stretim pastaim.

Mista Anapa tok, dispela raskol pasin em save kamap ol taim em klostu long Owens Comer eria we i gat 3-pela ol kain ples save stap.

Dispela lain em Hagen, Mendi, Gollala na ol asples Koiari.

Sapos long miting em gut na dispela wik bai ol bung wantaim Australian High Commission.

Dispela wok long stretim raskol

pasin em Koiri Developmen Autoriti inap wokim bikos em save stap long Kokoda Treil developmen operesin.

Tasol em 3 mun nau na ol i no wokim wanpela samting na ol lokol tua operetas tingting na stretim ol yet.

Nau yet Kokoda Treil em aninit long "No Free Travel Zone na husat turis laik go na wokabout mas kisim moa infomesen long Kevin Anopa bilong Saut Pasifik Tua, Narai Billy bilong Koiari tua o Niugini tua.

## Sentrel Woks i nogat sapot long wok

### KENNEDY EDENE i raitim

PROVINSAL Woks Dipatmen husat save wokim meintenens wok bilong ol gavman instituens insait long Sentrel provins nau wok long bungim hevi bikos nogat sapot i no kam long provinsal gavman long Konedobu.

Mista Sisia Mak bilong Woks na tu em wanpela supavaisa tok, komyunikesen na wok gut em pundaun pinis long mipela long 4 mail Provinsal Woks na Provinsal Woks Edministresen long Konedobu.

Mipela nogat gutpela fandim sapot long mipela ken go aut long fil na wokim meintenens long ol skul wara pam sistems na tu mekim ol ripea wok.

Nau yet sampela ol skul insait long provins i ol wok long bungim hevi tasol laki

bikos ol hevi ol painim em i no bikpela.

Ol skul olsem, larowari Provinsal Hai na Sogeri Nesenel hai Skul tupela save yusim larowari pam bai klostu bungim hevi. larowari i gat tupela pam tasol nau yet em save yusim wanpela nau.

Narapela em bagarap pinis. Sapos em bagarap em nau pinis, em tok Laloki hai skul pam em bin stop tasol Max na ol wok man bilong em helpim long stretim kwik.


Em tok tu long olgeta han rot bilong Sentrel provins em bagarap nogut tru nau bai mipela i no inap go aut na stretim o makim ol kontrek-tas long go na stretim bikos nogat mani.

Mipela nau stap nating long 4 Mail, westim taim bilong gavman na kisim fot-nait mani tasol nat-

ing, nating.

Em tok, dispela em nogut. Mista Sisia, singaut i go long provinsal gavman mas toktok hariap

wantaim Provinsal Woks na kamap wantaim sampela kain gutpela program bilong dispela yia na yumi stretim provins.



• Gavana bilong Oro provins Sylvanius Siembo i bilas stail tru wantaim ol Oro pipel long opim yia 2000 nupela yia nesanel palamen i bung.

## Kerema bai statim saksak fektori

### WENCESLAUS MAGUN i raitim

NAMBA wan provins long Papua Niugini husat i gat tingting long kamapim saksak fektori em Galf Provins. Man husat i go pas long dispela tingting em rijinol memba bilong Galf provins, Chris Haiveta.

Las wik Mista Haiveta na memba bilong Kikori Open na Gavana bilong Galf Riddler Kimave i tenkim Minista bilong Planning na Implementation Moi Avei long givim provins bilong ol K200,000 bilong karimaut stadi bilong kamapim saksak fektori long Kerema.

Galf Provinsal Gavman i pasim tok wantaim Menesing Dairekta bilong Sago Industri Tony Power long yusim dispela mani long karimaut wok painim i go insait long wokim dispela saksak fektori.

Mista Haiveta i tok nau yet ol i gat tingting long putim dispela saksak fektori long Malalaua distrik.

Em i tok opis bilong em bai putim narapela K200,000 antap long mani Nesenel Gavman i putim long kari-maut dispela wok painim.

Mista Power i tenkim Nesenel Gavman long luk-save long kamapim saksak fektori long PNG. Em i tok long las 20 yia em i bin askim Gavman long statim dispela industri tasol em i no bin kisim wanpela tok orait.

Em i tok taim dispela fektori i kirap ol bai salim saksak olsem Trukai Industri i save salim rais. Bikpela tingting bilong dispela fektori em long kamapim inap saksak paket long givim long ol pipel bilong PNG na sapos i gat moa yet i stap ol i ken salim long Malaysia na ol arapela kantri long wol.

Em i tok saksak bai kisim 20 pesen bilong ol rais we nau yet i stap long ol stoa.

Mista Power i tok kampani bilong em i laikim K280,000 bilong karim aut wok painim na K15 milien stret long wokim dispela

saksak fektori.

Em tok dispela fektori bai kamapim K8 milien long olgeta yia. Kampani bai kisim 50 wok manmeri long wok ful taim na samting olsem 140 fama bai wok long saksak blok bilong ol yet long salim i go long fektori long stat wantaim.

Em i tok tu olsem kampani bilong em bai i gat 30 pesen sia long dispela fektori na 70 pesen sia em ol lokol pipel yet wantaim Galf Provinsal Gavman bai i gat.

Em i tok wok bilong dispela fektori bai stat sampela taim long yia 2001.

"Long stat bilong dispela wok kampani bai kisim wanpela saveman bilong Asia long kam lukautim wok. Tasol bihain taim, kampani i gat laik long kisim ol save manmeri bilong PNG yet long ronim dispela kampani," Mista Power i tok.

Sapos yu laik save moa long saksak fektori yu ken ringim Tony Power long 323 2146.


<p>Sunshine Liquid Milk 1 litre      K1.50</p> <p>Roots Rice 1kg                      K1.27</p> <p>Bushells Tea Bags 25              K1.07</p> <p>Suncrush Cordial 750ml          K1.81</p> <p>Ramu Sugar 1Kg                    K2.34</p> <p>Steelo Steel Wool 5                 K1.18</p>	<p>Bluebird Sardines 425gr          K 1.95</p> <p>Gold Nuggets 25gr                 K0.30</p> <p>Arrow Delta Choc. 150gr         K1.25</p> <p>Globe Curry Chicken 300gr      K2.70</p> <p>Weet Bix 375gr                      K3.90</p> <p>Mothers Choice Flour 1Kg        K1.20</p>
---	--

Planti moa kaikai prais i go daun long en!

Ph: 325 7566, 325 0863 Fax: 325 7096



# HAILANS NIUS



## Enga putim K50,000 long Nesenel Ges Koporesen

GAVANA bilong Enga provinsel gavman, Peter Ipatas i putim K50,000 olsem sia bilong ol long Nesenel Ges Koporesen (NGC).

Gavana Ipatas i tok olsem wanpela dairekta bilong NGC em i sapos long go pas long putim dispela mani we gavman bilong em i bin redim long 30 Novemba las yia tasol bikos long wok em i no bin mekim.

Em i tok em i sapatim wok NGC i mekim na gavman bilong em i redi long wok bung wantaim NGC long lukim kaikai bilong dispela bisnis i karim kaikai insait long narapela 30 yia o moa.

Gavana Ipatas i singautim tu ol arapela Gavana long putim skel bilong mani bilong gavman bilong ol tu i go insait long NGC bai em

i ken ronim gut wok bilong en.

Siaman bilong NGC Alfred Kaiabe i tenkim Gavana Ipatas na ol pipel bilong Enga provins long putim dispela mani i go insait long NGC.

Em i tok wan wan Gavana bilong ol provins i pasim tok long putim K1 million i go insait long NGC.

I kam inap wik i go pinis Manus, Nesenel Kapitel Distrik Komisen, Is Sepik na Enga provinsel gavman i putim mani. Wan wan bilong ol i bin putim K50,000 i go insait long NGC.

Mista Kaiabe i askim ol Gavana bilong ol arapela provins long bihainim tok bilong ol yet na putim skel bilong mani bilong ol i go insait

long NGC bai em i ken yusim long mekim wok.

Ipatas givim K100,000 long Amapyaka Intanesenel skel

GAVANA bilong Enga provins, Peter Ipatas i tok gavman bilong em i bin givim K100,000 i go long Amapyaka Intanesenel skel insait long provins bilong em long wik i go pinis.

Em i tok dispela mani i kam aut long 'Enga Future Generations' fan. Dispela em i namba wan projek ol i yusim mani insait long dispela vot long karim aut.

Em i tok Enga provinsel gavman em i namba wan provinsel gavman long putim mani i go insait long helpim ol

intanesenel skel insait long provins.

Gavana Ipatas i tok astingting bilong dispela em bilong givim sans long ol pablik sevans insait long provins long salim ol pikinini bilong ol i go long ol intanesenel skel insait long provins na i noken wari long painim gutpela skel bilong pikinini bilong ol ausait long Enga provins.

Em i tok long dispela yia ol i kisim ol sumatin i kam inap long Hagen na dispela em i soim gutpela sain olsem Amapyaka Intanesenel skel i mekim gutpela wok bilong en.

Gavana Ipatas i tok Amapyaka Intanesenel skel i save larim ol pikinini bilong ples tu long go kisim sampela skel long we bilong yusim kompyuta.

## Lusim pasin pait long Asaro Veli: Karani

PLIS Minista Mathias Karani i tok strong long ol haus lain insait long Asaro veli long lusim ol samting bilong pait o nogat bai ol i kisim bikpela mekimsave bilong lo.

Minista i bin raun long lukim ol eria we i gat ol bikpela pait i stap i kisim dispela toksave i kam long Praim Minista Sir Mekere Morauta long traimit tok wantaim ol birua haus lain long stretim hevi bilong ol.

Mista Karani i tok sapos birua haus lain i no kamap wantaim rot bilong stapim hevi na pait, bai plis fos i go het na karimaut wok bilong em aninit long lo we i tok Inter Group Fighting Act we i sas bilong em i olsem 20 krismas long haus kalabus.

Mista Karani taim em i go toktok wantaim ol pipel bilong Kanosa na Andawayufa traib long Asaro veli, em i tok dispela pait i bin bagarapim gutpela nem bilong provins na i no gutpela tru long gutpela provins olsem lsten Hailans.

Em i tok dispela tok lukaut em las na sapos pait i stap yet, ol plisman bai i kam insait na i no inap surik long karimaut wok bilong ol.

Palamen i pasim lo bilong Inter Group Fighting na ol wokman bilong mi i no inap surik long karimaut dispela lo, Mista Karani i tok.

Em i tokim tupela birua klen ya olsem dispela birua pasin bilong ol bai kisim ol i go longwe tru long pasin

bilong gutpela sindaun long nau na bihain taim bilong ol pikinini bilong ol. Na dispela pait inap bringim planti hevi tru long bihain taim.

Laip bilong narapela man i no isi long skelim wantaim ol samting bilong graun olsem mani o graun o wanem kain samting yupela i wok long pait long en, Mista Karani i tok.

Em i askim ol long lusim ol dispela pasin we i nogat wanpela gutpela samting i stap long en na i no inap kamapim wanpela gutpela samting tu long ol. Nau em i taim bilong luksave long ol dispela pasin nogut.

Pait long Asaro veli i bin stat long 1995 tasol i bin stop insait long wanpela bung wantaim we Mista Karani i bin sindaun wantaim ol. Tasol sampela wik i go pinis dispela pait i kirap gen.

Mista Karani i go tu long Onamunga eria long Kainantu ilektoret na go lon Omara insait long Obura Wonenara ilektoret.

Long Onamuga pait, 10-pela lain i bin dai pinis na long Omura 6-pela lain tu i dai pinis. Dispela pait tu i bagarapim planti samting we i kos planti milien Kina olgeta long ol o samting we i bagarap.

Mista Karani i go wantaim Deputi Plis Komisina bilong Operesen Sam Inguba na ACP bilong Hailans Tony Wagambie

## Barnabas Paraka. Man bilong laikim samting i kamap

DAI bilong Barnabas Paraka i bin kamapim bikpela wari na sori tu long planti manmeri. Long famili bilong em, ol i lusim wanpela lewa tru bilong ol, wanpela papa na wanpela man bilong givim na lukautim ol. Long ol pipel bilong Moge Komunka traib, wanem samting em i bin mekim na kamapim insait long ples na wok bisnis, bai i hat long wanpela i kamapim dispela kain samting hariap long kisim ples bilong em.

Long sait bilong wok bisnis, em i wanpela gutpela hailans bisnismen we em i gat gutpela stori long wanem long rot em i kam long en long kamapim bisnis bilong em.

Planti husat i save long Barnabas Paraka i ken tokaut olsem em i wanpela man husat i laik lukim ol samting i kamap. Wok strong bilong em long bisnis i putim nem bilong em wantaim ol arapela biknem bisnismen olsem Simon Koruas, Michael Mel, Paul Pora na ol arapela moa.


Mama i bin karim em long 1957. Em i go long Holi Trinity Demonstration Skul na bihain go long Divine Word hai skul long Madang. Bihain i go bek long Mt Hagen Hai Skul long pinisim gret 10 na bihain go long Yunivesiti we em i stadi long Lo na Komes. Em i go bek long ples na baim kopi bihain long skul tasol em i sot long mani olsem na em i go wok long Lae long 1978

wantaim Associated Chemical Industry. Em i lusim gen na go wok olsem selsmen wantaim Metro Motors wanpela han kampani bilong ATA long Lae. Bihain em i trensfea i go long Transwest Ltd na wok olsem trenspot menesa.

Long i lusim wok long 1982 em i laik mekim praivet bisnis bilong em yet olsem na em i lusim wok na i go stat long salim ais blok long ol lokol maket. Long 1982 na 1986 em i go insait long planim kopi, salim ol samting na surukim ais blok bisnis i go. Long 1986 em i bungim ol lain bilong em na ol i kisim wanpela graun long Hagen taun. Em i kisim helpim

long sanapim wanpela bikpela opis we planti bisnis long taun i laikim. Bisnis i groa gut tru na i go moa long kirapim sevis stesin, traking bisnis, stua, holsel na haus kaikai.

Long 1997 i gat hevi long wok bisnis na beng i kam insait na kisim ol bisnis bilong em long givim long ol investa. Tasol Mista Paraka i go bilong em yet na inves insait long bisnis olsem haus bisnis o ril estet, kopi na pik bisnis inap long taim em i bungim dai. Em i lusim tripela meri bilong em wantaim 10-pela pikinini.



• Indai bilong leit Barnabas Paraka bai putim bikpela mak long bisnis na pipel bilong Westen Hailans Provins.



Orogen Mineral Limited

## ENUEL MITING

Toksave i go olsem Enuel Miting bilong ol memba bilong Orogen Minerals Limited bai kamap long Pot Mosbi Parkroyal Hotel, Pot Mosbi long Tunde, Mei 2, 2000 long 9.00 am moning

MICHAEL UIARI  
Company Secretary



# MADANG NIUS



## Madang laikim K400 milien long Niu Saut Wels

WENCESLAUS MAGUN i raitim

MADANG Provinsel Gavman i gat laik long kisim samting olsem K400 milien dinau long New South Wales (NSW) wanpela State long Australia bilong kamapim bik bris, pawa haus, na ples bilong rausim ol pipia long toilet, ples was na haus kuk long Basamuk.

Gavana bilong Madang Jim Kas i tokaut long dispela long Tunde long Mosbi insait long wanpela brekfas kaikai wantaim ol maus man bilong NSW.

Mista Kas i tok Madang gavman i sanap strong long kamap papa bilong bik bris, pawa haus, na ples bilong rausim ol pipia long toilet, ples was was, na haus kuk long Basamuk we Highlands Pacific Limited i gat tingting long kirapim fektori bilong nikel na kobalt.

Mista Kas i tok sapos ol i kisim dispela mani long NSW ol bai

yusim Madang Development Koporesen bisnis han bilong Madang Provinsel Gavman long wok bung wantaim wanpela menesmen kampani long lukautim bik bris, pawa haus na ples bilong rausim ol pipia long toilet, ples was was na haus kuk long Basamuk.

Mista Kas i tok tupela mausman bilong NSW i soim bikpela laik long helpim Madang gavman tasol i gat sampela moa toktok i stap yet bilong stretim.

Kos bilong dispela projek em i olsem K2.7 bilion. Na dispela projek bai kisim moa long 20 yia.

Mista Kas i bilip mani ol i kisim long bik bris, pawa haus, na ples bilong rausim ol pipia long toilet, ples was was na haus kuk long Basamuk taim Ramu projek i stat i ken bekim bek dinau ol i kisim long NSW na mekim gutpela win mani bilong Madang provins.

Mista Kas i gat laik long go long Sidni na stretim toktok wantaim Primia bilong NSW Bob Carr long dispela tingting.

## Madang Provinsel Gavman laikim edministreta

FOA yia kontrak bilong edministreta bilong Madang Clant Alok i bin pinis long Januari long dispela yia na nau yet Mista Alok i wok olsem ekt- ing edministreta bilong provins.

Long dispela as Madang Provinsel Eksekutiv Kaunsel (PEC) i bin mekim sabmisen i go long Nesenel Gavman long makim wanpela edministreta bilong Madang provins.

Insait long namba wan sabmisen PEC i bin givim nem bilong Clant Alok, Kikireng Wargem, na Galun Kassas. Nesenel Eksekutiv Kaunsel (NEC) i glasim dispela sabmisen na i givim tok orait long Galun Kassas long kamap edministreta bilong Madang. Tasol Mista Kassas i no bin tok orait long kisim

dispela posisen.

Gavana Kas i tok Mista Kassas i bin givim ektis olsem em i gat sik na tu em i amamas long holim wok em i holim long dispela taim olsem Deputi Edministreta bilong Edvaisori Sevis.

Wantok i traim long kisim tingting bilong Mista Kassas long dispela tok tasol wanpela opisa bilong opis bilong en i tok Mista Kassas i stap yet long malolo.

Gavana Kas i tok tu olsem NEC long opis bilong Dipatmen bilong Pesenel Menesmen i tok Mista Alok bai ekt yet long dispela opis long wanpela moa mun.

Gavana Kas i tok namel long dispela taim Madang PEC i mekim ken narapela sabmisen i go long

NEC wantaim nem bilong Mista Alok wantaim bikpela astingting olsem wanpela Madang man o meri yet i mas holim dispela opis.

Tasol NEC i no bin givim tok orait long dispela sabmisen.

Mista Kas long dispela wik i tok nau em bai namba tri raun Madang PEC i givim nem bilong tripela man gen i go long NEC long lukim, skelim na makim wanpela bilong ol olsem edministreta bilong Madang.

Gavana Kas i no tokaut long nem bilong arapela tupela man tasol wanpela bilong ol em Mista Alok. Long dispela taim Gavana Kas i askim ol pablik sevans long stap isi na mekim gut wok bilong ol.

## Ol binatang kisim nem bilong Madang

VOJTECH NOVOTNY i raitim

TUPELA mangi Madang husat i save wok wantaim ol save manmeri bilong ol arapela kantri long ol binatang i kisim bikpela nem pinis bihain long ol save manmeri i givim nem bilong ol long tupela binatang.

Ol dispela save manmeri i go het na kolim nem bilong wanpela binatang long nem bilong ples Ohu long Amele insait long transgogol

eria bilong Madang provins.

Dispela tupela mangi yah em long Brus husat i wanpela man bilong ples Ohu. Em i stat wok wantaim ol dispela save manmeri bilong binatang long 1995.

Olsem wanpela mangi binatang, em i helpim long mekim wok bilong glasim ol liklik binatang olsem ol binen. Sapos ol dispela liklik binatang i sutim yu long tel bilong as bilong ol, yu inap kisim bikpela pen tru. Ol dispela binatang i save helpim ol man na meri plawa long

karim pikinini. Em i glasim tu ol bikpela binatang husat i save kisim kaikai long wel kapiak.

Ol save manmeri bilong arapela kantri i tok ol bai kolim nem bilong wanpela bilong ol dispela binatang em i painim bihain long nem bilong em. Ol bai kolim dispela binatang olsem 'Ficobracon brusi'.

Moa yet, ol dispela save manmeri bai kolim nem bilong narapela binatang bihain long nem bilong ples Ohu we Brus i kam long en. Nem bilong dispela binatang em 'Krabidia ohuensis'.

Long sotim nem bilong dispela tupela binatang ol save manmeri bilong binatang long wol bai kolim nem bilong dispela tupela binatang olsem 'brusi' na 'ohuensis'. Ol save manmeri bilong binatang i tok i no ol liklik binatang tasol i nogat nem. I gat ol bikpela binatang tu i nogat nem.

Tupela yia i go pinis ol mangi binatang i bin painim wanpela binatang olsem bataflai tasol yu inap lukluk i go long hapsait bilong wing bilong dispela binatang. Na ol i kolim dispela binatang 'dali', bihain long Chris Dal.

Ol save manmeri bilong binatang long wol i tok ol save manmeri bilong binatang bai yusim ol dispela nem yet long narapela 100 yia i kam bihain na i go moa yet.

Ol save manmeri bilong binatang long wol i tok i gat planti moa binatang long Papua Niugini i stap yet we ol i mas givim nem long ol.

Ol mangi binatang i stap long Nagada long Madang. Ol i save kisim piksa bilong ol binatang wantaim dijitel kamera na putim i go insait long intanet laibreri bai ol save manmeri bilong binatang long wol i ken glasim na mekim wok painim.

Sapos yu gat intanet, yu ken lukim intanet adres bilong ol long [www.entu.cas.cz/png/](http://www.entu.cas.cz/png/). Yu ken lukim tu moa long 100 piksa bilong ol kain kain binatang long [www.bishop.hawaii.org/bishop/nat/sci/ng/ngecol.html](http://www.bishop.hawaii.org/bishop/nat/sci/ng/ngecol.html). O yu ken rait i go long ol long dispela adres: Parataxonomist Training Center, PO Box 604, Madang.



• Ol save manmeri bilong wol husat i save mekim wok painim i go insait long ol binatang, i painim aut olsem PNG i gat bikpela namba bilong ol binatang long wol we ol save manmeri bilong binatang long wol i nogat nem bilong ol yet. Poto ya i soim sampela ol wokman bilong PNG husat i save helpim ol pipel long ples long lukautim welbus, graun, wara, binatang, welabus, pis, pisin na solwara bilong ol. Poto: Leo Yat

## Midel Ramu kisim nupela Lokol Level Gavman

MIDEL Ramu Open Iilektoret nau i gat foapela Lokol Level Gavman bihain long Gavman bilong Jim Kas i tok orait long kamapim Kovon LLG. Pastaim Midel Ramu ilektoret i bin gat Josepsta LLG, Arabaka LLG, na Simbai LLG.

Long las wik Fraide, Gavana Kas wantaim deligesen bilong en i bin go long Kovon wantaim ol samting bilong wokim kaunsel semba bilong Kovon LLG.

Mista Kas i tok Madang Provinsel Gavman i bin putim K170,000 long wokim Kovon LLG semba. Dispela semba bai i gat 7-pela opis spes bilong ol opisa bilong ol kaunsel, presiden, namba tu presiden, kodineta bilong sabdistrik em wanpela kiap yet na ples bilong holim kaunsel kibung.

Em i tok long las wik Fraide Madang Provinsel Gavman i sataim 20 balus sata long kisim ol samting bilong wokim dispela semba

i go long Kovon. Na i gat 15 balus sata i stap yet.

Mista Kas i tok astingting bilong kamapim namba foa LLG long Midel Ramu em bikos namba bilong ol pipel long dispela ilektoret em i bikpela tru. Na tu ol ples i stap insait long Kovon LLG i no stap klostu long Simbai LLG.

Em i tok ol kaunsel bilong Kovon LLG bipo i save kisim samting olsem wan wik long go long Simbai. Na i nogat rot, ples i gat planti bikpela

mauten, strongpela maunten wara na i hat tru long bringim sevis i go.

Mista Kas i tok ol ples insait long Kovon LLG i stap insait Western Schreders na wanpela grup bilong ol pipel long Kovon LLG em ol pipel bilong Hagahai.

Em i tok Kovon LLG em i stap namel long boda mak bilong Is Sepik, Enga, Western Hailens na Madang, provins. Long stapim ol ausait lain long go insait long dispela eria na paulim

ol pilim long kisim ol risos bilong ol, i gutpela long kamapim wanpela han bilong gavman long glasim ol wok na ol arapela bisnis long dispela eria.

Mista Kas i tok tu olsem aninit long Ogenik Lo bilong Provinsel na Lokol Level Gavman, wanpela ilektoret i mas gat tripela LLG.

Tasol sapos i gat gutpela as olsem i mas gat foapela LLG orait dispela ilektoret i ken kisim namba foa LLG.

Long dispela as Madang provinsel gat i kamapim Kovon LLG.

Mista Kas i tok gavman bilong em i gat tingting long kamapim namba foa nupela LLG tu long Raikos.

Dispela nupela LLG em bai kamap long Nayudi.

Long wankain taim Madang gavman bai kamapim tu Gama LLG insait long Usino Bundi ilektoret. Nau yet ol i gat Usino LLG na Bundi LLG.



# Lae Nius

## Bos bilong Lae plis givim tok lukaut

FRANCO NEBAS i raitim

PLIS long Lae long dispela wik i holim wanpela skul sumatin bilong Bugandi Hai Skul bihain long ol i painim em i gat wanpela vidio tep nogut.

Plis bos long Lae Sief Suprintenden Awan Sete i tok plis i bin mekim patrol bilong ol ran i kam long Huon Rot we ol i bin painim dispela boi.

Em i tok ol plis i saspek long em na stop long sekim em we ol i painim dispela tep nogut na wanpela vidio dek (masin) em i karim wantaim.

Dispela boi i wokim gret 12 long Bugandi hai skul.

Mista Sete i tok long wankain taim yet em i salim strongpela tok lukaut i go long ol draiva long rot long bik moning long lukaut long ol man nogut.

Mista Sete i mekm dispela toktok biain long planti raskol pasin i kamap long rot namel long 3 na 4 Mail long Lae.

Em i tok tupela raskol pasin i

kamap las wik we wanpela bisnisman long Madang em ol raskol i stapim em long 4 Mail na stilim olgeta samting bilong ka.

Long wankain taim tu Post PNG ka em ol i holim na stilim ol samting we kos i olsem K974.

Mista Sete i tok dispela ol pasin i save kamap long moning taim olsem long 10 kilok we ol yangpela manki i save karamapim pes na mekim dispela pasin.

Em i tok lukaut long ol draiva long rot sapos ol i kam long 4 Mail o 3 Mail eria ol i mas lukaut gut na stopim ka bilong ol.

Long wankain taim tu ol stilman i bin brukim Niugini Electrical kampani stua na stilim ol samting kos olsem K3,280 na tu wanpela Auto Kampani we ol i kisim K1200 kes mani.

Dispela tupela hevi i kamap long Aircorps rot long Lae.

Plis mekim wok painimaut yet.

Plis tu i holim tupela kalabus man ronawe long Buimo haus kalabus long Lae. wanpela bilong ol em plis i holim em wantaim spak bruk long wiken.

## Lae kot harim man i paulimK13,000

SAPE METTA i raitim

Distrik Kot long Lae i larim wanpela man Is Nu Briten i go aut long sel bihain long em i bin baim K300 beil mani na i stap wetim kot we bai kamap long wanpela de em kot yet bai makim.

Melchoir Varpin husat i gat 23 kris-mas bilong ples Takavur long Is Nu Briten provins i bin mekim paul pasin na stilim moa long K13,000 taim em i

bin wok olsem kuskus wantaim Consort Shipping kampani long Lae.

Kot i harim olsem Varpin i bin yusim na sainim nem bilong Colin Seely na John Yang long sek buk bilong kampani na stilim ol dispela mani.

Distrik kot mejistret Jerry Singomat i bin tok orait long beilim aut difenden ya bikos long helt sait bilong en na em i mas kamap na ripot long Lae kot haus long Fraide long wan wan wik inap kot bilong em i kamap.

## Deka Seket redi long yut rali

Deka seket insait long Bukawa distrik long Morobe provins bai holim wanpela bikpela yut rali (bung) stat long tude (Fonde) i go pinis long Sande.

Dispela bung bai lukim ol yangpela kristen i kam long foapela peris insait long Bukawa eria.

Ol peris ya em, Hos Viles Kapakona, Busong Deinzerhidl na Busini (Finsch).

Kapakona peris long bikples Bukawa yet bai hostim dispela bikpela bung.

Siaman bilong Labuta lokol level gavman kaunsel Ruben Tisan i tok ol yuts long Kapakona peris i wok hat

tru long stretim ol ples bilong slip na we dispela kibung bai kamap.

Mista Tisan i tok samting olsem moa long 280 kristen yuts bai kamap long dispela bung.

Em i tok dispela foa de bung bai lukim planti ol sios samting i bai kamap.

Em i tok dispela em namba wan taim kain bung olsem, bai kamap na ol i lukluk olsem em bai kamap gut.

Ol sampela bikman bilong Luteran sios bai kamap tu long dispela bung wantaim memba bilong Nawae, Mista Kennedy Wenge.

## 'Haiwe PMV i sasim fea long laik'

Sapos yu wanpela man o meri i save yusim PMV na ron i go i kam long haiwe namel long Goroka na Lae, ating bai yu paul liklik long wanem i gat kainkain sas em ol lain husat i save ronim PMV i save sasim.

Na dispela i kamapim planti komplem i kam long pablik husat i save ron long ol PMV bas na ka.

Wanpela long ol dispela man husat i komplem em Alung Ruben husat i save i stap long Goroka na i save yusim PMV na ron i go i kam long Lae.

Mista Ruben husat i asples man bilong Salamana klostu long Lae siti i tok em i no wanbel na hamamas long ol PMV i sasim ol pasindia long laik.

Em i tok ol PMV i nogat mak stret bilong sasim ol pasindia olsem na ol i wok logn sasim kainkain sas long laik olsem K12, K13, K14 na K15. Dispela em i wan we sas bilong Goroka na Lae.

Mista Ruben i tok dispela em i wanpela hevi we ol PMV i wok long paulim ol manmeri i go i kam.

Em i sutim tok nau i go long ol Lens Trensport Bod long i no mekim kliia ol sas bilong PMV long ol pablik.

"Lens Trensport Bod i mas lukluk na stretim dispela hevi so ol man na meri i ken save long mak stret bilong baim fea bilong ol taim ol i yusim haiwe long ron i go i kam", Mista Ruben i tok.

## Kigasung i laikim pipel holim kristen pasin

Ol kristen long Lae i mas stat mekim samting long traim stopim pasin pamuk long dispela nupela taim.

Het bisop bilong Ewanjelikal Luteran sios (ELC-PNG) Dokta Wesley Kigasung mekim dispela toktok long lonsing bilong Lae siti seket faiv yia plen long Bumayong ausait long Lae siti.

Long wanpela baibel riding long buk bilong Nehemiah, bisop i surikim tok liklik salensim kristen long ol samting ol i laikim long mitim ol sosel brek daun kamap long tude's sosaiti.

"Long niuspepa las wik i tok Lae siti i wok long kamap hariap long ples bilong pamuk.

Luteran kristen mas kirap na ekseaisim bilip bilong yupela long mitim dispela salens." Bisop Kigasung i tok.

Em i wari olsem pasin bilong kristen em ol kristen i no bihain-

im na wokim we pasin bilong raskol, bagarapim meri, kilim man i dai na stil i kisim ples insait long lewa bilong Luteran provins.

Dokta Kigasung i tok amamas long ELC Lae siti seket long kamapim nupela rot long plenim pasin bilong ol kristen wantaim nupela faiv yia plen.

Em i gutpela long lukim kristen plenim long go pas long stretim dispela kain ol pasin long nupela taim.

Olsem propet Nehemiah, mi askim yupela long lukluk long pundaun bilong yupela na atekim plen long kisim eksen," bisop i tok.

Pasin pamuk, patilong nait long sosol klab, drink bia long pablik, mekim stil pasin na arap raskol pasin long Lae.

Lae siti seket faiv yia plen em long go het long lukluk long ol


kristen wok, olsem sering. Ewanjelisim progrms, edukasen na kisim bek bilip long sios.

Long wankain taim yet Morobe Gavana Luther Wenge, husat i bin stap long seremoni, i singaut long ol kristen long yusim save God i givim long go het na mekim wok bilong em.

"Noken hatim bilip bilong yupela insait long yupela yet. God i givim yumi olgeta wan wan presen na yumi mas yusim long glori bilong em, Wenge i tok.

Em i tok Lae siti em i bikpela hap tru wantaim planti ol pipel wantaim kainkain kalsa we ol kristen i mas wok hat long winim ol dispela sol.

"Olsem kristen yumi mas pait strong long rausim man nogut husat wok long bagarapim sosaiti bilong yumi. Yumi mas wok wantaim long gutpela bilong arapela," em i tok.



• Morobe Gavana Luther Wenge (lephan), Praim Minista Sir Mekere Morauta na embeseda bilong Japan i sanap long fran bilong sain we i soim opim bilong Umi bris long Makam.

**PHONE:**  
(675) 472 - 3912

**FAX:**  
(675) 472 - 3919

**IMPACT**  
SIGNAGE  
PNG

*Any Size,  
Any Shape, Any Amount*

• COREFLUTE SIGNS  
• METAL SIGNS  
• BUMPER STICKERS  
• T-SHIRTS  
• STUBBY COOLERS  
• BILLBOARDS  
• BUNTINGS  
• POINT OF SALE

**GE**

**FOR ALL YOUR PRINTING NEEDS**

P.O. Box 3705, Lae, M.P. 411, Papua New Guinea - Email: impact@global.net.pg

# ELCPNG i no rausim Melpa Sios

**WENCESLAUS MAGUN i raitim**

EVANJELISM dairekta bilong Evanjelikal Lutheran Sios bilong Papua Niugini Reveren Beka Kosieng i tok ELCPNG i no rausim Melpa Lutheran Sios bihain long toktok i kamap olsem Melpa Lutheran Sios long PNG i

tok olsem 'sios bilong ol em i rijisted Lutheran Sios long Papua Niugini.'

Las wik Seketeri bilong Melpa Lutheran Sios long PNG, Reveren Jack Alko i salim wanpela ripot i kam long Wantok na i tokaut olsem Melpa Lutheran Sios long PNG em i namba tri rejisted Lutheran Sios long kantri.

Tasol Reveren Kosieng i tok,

"ELCPNG i nogat wanpela ofisel dikleresen i kamap yet olsem Melpa Lutheran Sios long PNG em i namba tri rejisted Lutheran Sios long kantri."

Em i tok Melpa Lutheran Sios em i kam aninit yet long ELCPNG na Hagen Distrik.

"Mi yet mi lukim olsem ol i memba bilong ELCPNG," Reveren Kosieng i tok.

# ELCPNG Evanjelism Dairekta go long Siasi

LONG dispela wik Fraide ELCPNG Evanjelism Dairekta, Reveren Beka Kosieng bai i go long Siasi ailan long opim wanpela nupela haus lotu long Kapalap insait long Siasi Distrik. Em bai go wantaim Distrik presiden bilong Siasi, Pastor Micah Yalamu.

Em i tok long dispela wokabaut bilong em, em bai tokim ol pipel bilong Siasi olsem Melpa Lutheran Sios em i no namba tri Evanjelikal Lutheran Sios long PNG sapos ol pipel i laik save moa long dispela.

Long wankain taim em bai toktok long awenes program bilong ELCPNG long Sande Julai 12 na tu long 'Reformation' Sande long Oktoba 31.

Reveren Kosieng i tok em bai askim tu ol Lutheran bilong Siasi long

sapotim Ministeriel Sapot Fan (MSF) bilong ELCPNG.

Narapela bikpela toktok em bai mekim em long askim ol bilip manmeri na pikinini long strongim pasin bilong wok bung wantaim namel long Nesenel opis, Distrik, Seket na ol peris.

Em i tok pasin bilong wok bilong sios i mas go daun na kam antap i mas stap stret long mak.

Reveren Kosieng bai strongim tu bilip bilong ol bilip manmeri long dispela yia bai ol i noken poret long ol paul toktok olsem yia 2000 em i las yia long dispela graun.

Em bai tokim ol pipel long sanap strong long bilip bilong ol.

# Kobe Wipom Memorial Skul bai op long Me

**WENCESLAUS MAGUN i raitim**

KOBE Wipom memorial komyuniti skul bai op sampela taim long mun Me sapos olgeta samting i stret, Jenerel Seketeri bilong Papua Niugini Kaunsel Ov Sios, (PNGCC) Shopie Gegeyo i tok.

Wok bilong dispela K300,000 komyuniti skul klostu bai pinis na PNGCC i amamas long tokaut long dispela.

Mis Gegeyo i tok nau yet ol pipel bilong Wipom, Warapu na Rowoi i wok long yusim dispela skul.

I gat samting olsem 200 sumatin i go stat pinis long skul na skul i gat tingting long kisim sampela moa sumatin. Dispela bai bringim namba i go antap long 300.

Mis Gegeyo i tok i gat 5-pela tisa i tis i stap long Wipom pinis.

Em i tok nau yet ol i yusim nem Kobe Wipom memorial skul tasol taim ol i opim dispela skul Katolik Sios long Aitape bai givim nupela nem bilong en long wanem dispela skul nau i kam aninit long Katolik Ejensi skul long Aitape daosis.

Mis Gegeyo i tok bikpela mani



• Jenerel Seketeri bilong Papua Niugini Kaunsel Ov Sios, (PNGCC) Shopie Gegeyo.

bilong kirapim dispela skul bihain long tsunami i bin bagarapim ol skul long Aitape haus sik, ples na kilim moa long 2000 pipel long 1998, i bin kam long ol pipel bilong Kobe long Japan.

Wantaim dispela mani ol i bin mekim pinis tripela dabol klasrum, 5-pela haus tisa ol i mekim pinis na wanpela ol i mekim yet. Dispela skul i gat 6-pela klasrum.



• PNGCC i laikim olgeta sios long Bogenvil i mas sekan, tok sori na strongim gen wok bilong sios. Dispela singaut i kam tu long Bogenvil sios kaunsel.

# Program bilong taun na ples i no wankain

OL komiti husat i stap insait long mekim program bilong helpim ol pipel i mas luksave olsem ol pipel long taun na ples i no wankain na program ol i mekim i mas sut stret i go long helpim wan wan grup. Bruda Dennis bilong Hohola Rimand Senta husat i toktok long riabilitesen program i tok.

Em i tok wanpela bikpela hevi i olsem bikpela hap bilong wok em ol i save mekim wantaim kain ol program olsem na liklik sevis tasol i save go long ol pipel.

Lao Poka wanpela komyuniti lida bilong Taikone insait long Nesenel Kapitol Distrik i tok em i tanim bel bikos long ol helpim ol sios i givim na i no gavman.

Em i tok strong olsem ol gavman sevis i no go long em na ol arapela yut, tasol ol sevis ol sios i givim em ol i kisim. Nau ol i tanim bel na komyuniti i luksave long ol olsem ol memba bilong komyuniti.

Em i tok gavman sistem i bin pusim em i go aut long ol rot, tasol God i bin kisim em bek na bringim em i go insait long sosaiti nau em i stap long en.

# Sios i gat gutpela lida

... Gavman mas kisim skul long sios

**HELEN REI i raitim**

OL sios long ples i bin soim gutpela rot na pasin long mekim wok olsem ol lida na nesanel gavman i mas go daun long level bilong ol sapos gavman i laik lainim wok bilong lida man o meri.

Planning na Implementation Minista, Moi Avei i salensim gavman long glasim wok bilong ol lida man na meri long ples na statim bek wok bung pasin namel long gavman na sios.

Toktok long wanpela de semina long ol toktok bilong sosel developmen long Palamen tu wik i go pinis, Mista Avei i tok gavman i nogat inap samting, olsem na em i mas lukluk i go insait long ol eria we em i mas askim ol lida long bihainim pasin

ol sios i save mekim.

Astingting bilong dispela semina em long lonsim namba tu komiti long sosel developmen polisi we Home Affairs dipatmen i stap insait long en. Insait long dispela program ol i gat laik long kisim olgeta lain insait long komyuniti wantaim ol sios long painim aut ol hevi i stap insait long komyuniti na painim rot bilong stretim.

"Salens em long go na bungim ol sios lida na i no long autim toktok long Waigani. Gavman i nogat inap wok long mekim na em i no inap long karim aut olgeta sevis insait long siti.

"Oltaim ol sios i bin givim ol dispela sevis na ol i gat gutpela netwok we yumi mas yusim. Wok bilong yumi nau em long wisel na painim aut yumi stap we long sait bilong developmen. Bel na laik bilong

mekim wok bipo i bin stap nau i no stap," Mista Avei i tok.

Em i tok planti lain i ting olsem ol lain i save brukim lo i kam long ol setelmen. Tasol em i no tru, ol pikinini bilong ol lain i gat planti samting.

"Julai 9 senses i no inap givim yumi piksa bilong ol developmen samting i kamap tru, olsem na gavman i mas putim mani na ol arapela risos i go insait long ol sosel eria bipo long ol i kamap wantaim ol progrem bilong stretim ol wari bilong ol," Mista Avei i tok.

"Mi amamas olsem komiti i bringim wanpela nupela awenes long bikpela ol sosel hevi, olsem long sait bilong putim mani na ol arapela risos i go insait long helpim ol manmeri long wanem ol pipel em konaston bilong sosel developmen," Mista Avei i tok.

## PALAMEN RIPOT wantaim WENCESLAUS MAGUN

## Skate tok NPF i olsem bom

... i redi long pairap

OPOSISEN lida Bill Skate i tok hevi bilong Nesenel Providen Fan (NPF) em i olsem wanpela tam bom i redi long pairap.

Tasol em i tok Oposisen bai givim olgeta sapot bilong em long kamapim wanpela rifom progrem long stretim gen straksa bilong Nesenel Providen Fan olsem bai em i ken kamap wanpela ogenais-esen i gat ol gutpela pasin, i ron gut na i noken gat pasin bilong mani i paul.

Tasol em i tok wanem disisen NPF bod i bin mekim nau long

rausim 50 pesen bilong ol mani ol memba bilong NPF i save putim i go insait long NPF em i no gutpela na i sindaun long boda bilong brukim lo.


"Mi no inap sindaun na larim dispela samting i kamap. Ol wokman bilong dispela kantri i noken kisim pen nating long sampela hevi liklik lain tasol i mekim," Mista Skate i tok.

Long wankain taim Praim Minista Sir Mekere Morauta i tok Gavman bai mekim olgeta samting


em i ken mekim long helpim NPF menesmen long daunim ol bikpela hevi NPF i wok long bungim long dispela taim.

Em i tok Gavman bilong em bai kamapim wanpela komisien bilong inkwairi long glasim wok bilong NPF na sasim ol lain i paulim mani bilong NPF.

Em i tok wanpela wok painim i kamap long stat bilong dispela yia i soim olsem Gavman i gat bikpela asua long paulim bikpela mani bilong NPF.



• Bill Skate.



• Paias Wingti.

## Skate salensim Wingti long sekim em yet

OPOSISEN lida Bill Skate i salensim olpela Praim Minista Paias Wingti long sekim ol pasin bilong em yet bipo long em i go het na daunim poin bilong ol arapela Praim Minista olsem em yet.

Mista Skate i tokim ol nius ripota long Palamen long Fraide las wik olsem em i no amamas long wanpela ripot i kamap long niuspepa long las wik we i tok, 'Wingti i bagarapim nem bilong Skate'.

"Mi laik tok klia long Paias Wingti olsem Praim Minista bipo na wanpela lida man bilong kantri olsem yumi olgeta i bin karim wankain tok na i noken sutim tok long ol arapela Praim Minista," Mista Skate i tok.

Em i tok olpela Praim Minista i mas wok bung wantaim long painim stretpela rot bilong stretim ol hevi

kantri bilong yumi i wok long bungim na i noken tromoim malumalu graun long arapela arapela. Em i tok tu olsem kain toktok Mista Wingti i mekim i no gutpela long kamap long taim bilong kra i long wanpela biknem bisnis man bilong Hagen, Barnabas Paraka long Hagen. Em i tok Mista Wingti i lus tingting olsem long taim bilong gavman bilong em long 1992 inap 1994. PNG i bin bungim hevi bilong mani.

Em i tok long dispela as Mista Wingti i mas givim bek sampela gutpela samting long kantri. Mista Skate i tok aninit long gavman bilong em, em i bin baim bek K650 milien bilong ol dinau gavman i gat long ol arapela lain ausait long kantri. Dispela i bringim K4 bilien dinau long ausait i go daun long K3.5 bilien.

## Momis tenkim Gavman long Loloata toktok

GAVANA bilong Not Solomons provins John Momis i givim bikpela tok tenkyu long Gavman, ol Bogenvil, Oposisen, Australia, Nu Silan, Fiji, Vanuatu, ol lain bilong Yunaitet Nesen, ol sios, na ol meri long kamapim Loloata bung.

Em i tenkim olgeta dispela lain long partim toktok bilong painim rot bilong kamapim gutpela sindaun long Bogenvil.

Mista Momis i tok dispela 'Loloata Understanding' em i kamapim wanpela rekot insait long ol kantri i wok long develop yet na i soim ol arapela kantri long wol olsem ol lida bilong PNG i gat bikpela wok long bringim bel isi we bai stap oltaim long Bogenvil.

Em i tok dispela pait long

Bogenvil em i no hevi bilong ol pipel long Bogenvil tasol. Nogat. Em i hevi ol pipel bilong arapela hap bilong PNG i gat.

Dispela hevi Mista Momis i tok em long pawa Nesenel Gavman i kisim long ol Provinsel na Lokol Level Gavman we i mekim ol i gat liklik pawa tasol bilong mekim ol disisen long lukautim sindaun bilong ol.

"Givim pawa long ol pipel bilong yumi. Givim pawa long ol provins bilong yumi. I no Bogenvil tasol," Mista Momis i tok.

Em i tok PNG em wanpela kantri tasol ol pipel bilong PNG i gat. Olsem na Nesenel Gavman i noken holim bek olgeta pawa.

Mista Momis i tok wanem samt-

ing ol pipel bilong Bogenvil i mekim i laik tokim Gavman olsem: 'Mi no laik stap tripman long graun bilong mi yet.'

Long ol lida bilong Bogenvil em i tok taim bilong toktok em i pinis. Em i tok nau em i taim bilong givim marasin bihainim olgeta toktok ol lida i mekim pinis.

Em i tok ol lida bilong Bogenvil na PNG i mas painim gutpela demokratik rot bilong painim gutpela sindaun long Bogenvil.

Mista Momis i tok nau em i taim bilong 'win win'. Em i tok toktok bilong atonomi em i no toktok bilong bruk bruk. Nogat. Em i tok toktok bilong givim moa pawa long wan wan provins bai ol yet i ken lukautim ol yet.

## ELA MOTORS HANKOOK TYRES

**Planti stail long ol kualiti Hankook tyres long fitim ol kain kain kar na trak**

Kisim ol long Ela Motors Pats dipatman na ol Tyre senta long olgeta hap.

**HANKOOK**  
TYRES



PROUD SPONSOR  
OF THE PNG OLYMPIC  
COMMITTEE



*Rinin Miapela nau!*

**Ela Motors**

LONG OLGETA HAP

VISITIM WEBSITE BILONG MIPELA - <http://www.elamotors.com.pg>



HEAD OFFICE PH 3229614 PORT MORESBY 3229414 LAE 4722322 KOKOPO 9829100 RABAUL 9821988 MADANG 8522188 GOROKA 7321844 MT HAGEN 5421888 WEWAK 8562255  
KAVIENG 9842788 KIMBE 9835155 TABUBIL 5489060 VANIMO 8571254 PORGERA 5479367 KUTUBU 5496685 BUKA 9739017 LIHIR 9864099 ALOTAU 6410100

# Rot bilong lukautim tit long stap gut na helti



• Tit bai kamap strong na stap helti sapos yu kaikaim planti gupela helti kaikai olgeta de. Dispela em ol gaden kaikai na prut olsem kulau, popo, kukamba, pinat na ol arapela prut olsem piksa i soim.

GUTPELA tit em bikipela samting long laip bilong yumi na em wok bilong wanwan manmeri na pikinini long lukautim gut tit na long wankain taim tu, tit bai lukautim yumi. Dentel seksen bilong Dipatmen bilong Helt i tok

Man i gat gupela tit bai i painim isi i no long kaikai tasol, nogat. Em bai helpim em gut long

ol sosel bung na ol arapela rot moa olsem bikos em bai ino inap long sem long lap, tok tok na givim pablik spis long ol bikipela bung.

Olsem na yumi wanwan i mas mas lukim olsem wok bilong yumi long klinim na lukautim gut tit bilong yumi, Dentel opis i tok.

Opis i tok sapos wanwan manmeri na pikinini i hevi, yumi mas



• Klinim tit long olgeta de olsem manki long piksa ya i mekim.



• Abrusim ol kaikai we i gat planti suga na swit long ol bikos ol bai bagarapim tit na em bai ros na sting. Em ol kain kaikai olsem ol sof dring, kodiell, ol soklet, ol swit biskit na ol kain kaikai olsem. Ol piksa i kam long Orel Helt Sevis wantaim Helt Dipatmen.

kwiktai go na lukim dokta long en.

Hevi long tit i wok long go bikipela long PNG tude na moa pipel i wok long lukim ol

dokta bilong tit wantaim ol kain kain hevi bilong tit.

Moa long neks wik...

# Medikol bung bai pulim ol ovasis dokta

VERONICA HATUTASII i raitim

BIKPELA wanpela wik bung bilong ol dokta ol i kolim long Medikol Simposium we ol bai holim long mun Septemba long dispela yia bai toktok, glasim na skelim ol kain sik na senis long rot we ol i wok long kamap bek gen, ol laipstail sik, manpawa, ol arapela bikipela isus we i sut long ol rises wok ol dokta long kantri i wokim na ol nupela wok kamap long medikel sait we i wok long kamap long wol.

Presiden bilong Medikol Sosaiti Dokta Mathias Sapuri i tok nainpela biknem ovasis dokta bai i stap insait long bung na givim ol toktok. Mein ges spika em Dokta Julian Bilous husat i beis wantaim Wol Helt Ogenaisesen long Filipins. Narapela sevenpela ges spika em Dokta Wame bilong Fiji Medikol skul, Dokta Michael Alpers foma Dairekta bilong PNG Medikol Rises Institut, Dokta John Collins em wanpela saientifik rises

opisa long London, Dokta Aldo Vacca bilong Brisben Maters haus sik, Profesa David Watters foma sief sejen long Pot Mosbi Jenerel haus sik, Profesa frank Shann em Profesa long Pidiatriks long Royel Childrens Haus sik long Melbon, Australia na Profesa lan Maddocks foma namba wan bos long Medikol Fakalti na paionia dokta wantaim PNG Institut ov Medikol Rises.

Dokta Sapuri i tok dispela bung em i bikipela samting na em i olsem "Think Tank" bilong Helt Dipatmen na medikol profesen bikos ol rises pepa, ol toktok na ol samting we ol i kamapim long en em dipatmen na ol dokta long kantri i save yusim long skruim wok bilong ol.

Em i tok tu olsem manpawa trening o trening bilong ol wokman long kamap olsem ol dokta, ol rises opisa na long helt dipatmen insait long kantri em i wanpela bikipela samting tu we bai bung i lukluk long en.

Em i tok PNG i gat ol

speselis dokta na nau 95 pesen long ol speselis dokta long kantri em ol asples PNG lain. Long pastaim, 25 pesen tasol em ol bin ol nesenel dokta tasol wantaim moa lokol manmeri i kisim skul na trening long dispela samting, mak i senis.

Dokta Sapuri i tok tu olsem ol i salim tok i go long ol dokta na helt lain bilong ol arapela Pasifik Ailan kantri bilong kam long dispela bung.

Em i tok tu olsem ol lain husat i laik prisenerim ol rises pepa samting em ol mas salim ol i kam bipo long Jun 30.

Em i tok bung ya i wanpela rot bilong ol yangpela dokta na ol arapela helt opisa insait long kantri bilong lainim ol nupela samting we i wok long kamap long wol bilong marasin.

Dokta Sapuri i luksave long sapot bilong Helt Seketeri Dokta Puka Temu na dipatmen we i gviim ol kompyuta, fotokopi na feks masin long sanapim seketeriet bilong lukautim bung ya. Kos bilong ol masin ya em K32,000.

# Edukesen rifom wok gut long NCD

WANPELA bikipela samting we Nesenel Kapitel Distrik Komisn (NCDC) i wok long kari-maut nau long edukesen plen bilong en em long sanapim moa klasrum insait long ol skul long siti, ol saiens laborotori, ol laibreri, ol haus tisa na tu putim ol kompyuta samting bilong skruim save bilong ol sumatin.

Siti Edministreta Jamie Maxtone-Graham i bin autim tok long dispela samting long bung bilong ol sinia edukesen opisa na ol edukesen siaman

long kantri insait long wanpela bung bilong ol long Mosbi long dispela wik.

Mista Maxtone-Graham i tok Komisn i gat bikipela wok long appretim ol edukesen fasiliti na lukim olsem olgeta pikinini long siti i gat ples long skul long en na ol gat ol tisa long givim gupela skul na save long ol.

Em i tok NCDC i katim K28 milien bilong ol edukesen program, ol skul gren na subsidi insait long ol siti skul long dispela yia. Ol program i karamapim bild-

ing bilong ol haus tisa, klasrum na ol toilet blok.

Em i tok ol bai bildim ol saiens bilding na laibreri long ol Topap skul insait long siti.

Mista Maxtone-Graham i tok long namba wan taim tu ol bai baim ol laibreri na saiens buk wantaim baset mani we NCDC i katim i go long edukesen. na ol bai tilim i go long ol wan wan skul long siti.

Em i amamas long lukim olsem edukesen rifom i wok gut insait long NCD

# Medikol Sosaiti laikim moa sapot

MEDIKOL Sosaiti bilong Papua Niugini i putim askim long pablik bilong sapotim Sosaiti long ol fan resing wok bilong pulim mani long putim kamap bikipela bung bilong ol long dispela yia.

Sosaiti i bin kirapim ol fan resing apil long mun Mas bilong dispela yia taim em i lonsim fan resing apil bilong em.

Bung bai i kamap long Pak Royal Hotel long Mosbi long Septemba 3 inap long de namba 9.

Presiden bilong Sosaiti na bos bilong Medikol Fakalti Dokta Mathias Sapuri i tok Insait long tupela mun nau, Sosaiti i resim K33,475. Taget mani mak we em (Sosaiti) i laik long resim long putim kamap dispela

bikipela anuel bung em K100,000.

Dokta Sapuri na Dokta Joe Bana-Koiri husat i Siaman bilong Sosaiti i bilip strong olsem ol bai inapim taget mak bilong ol.

Dokta Sapuri i tok ol i amamas long kisim K23,350.00 i kam long ol ovasis sponsa olsem AusAID we i givim K15,000, Royel Kolis ov Fisisens husat i givim K7,850 na N.Stenning &Company (Australia) we i givim K500.00.

Ol kampani insait long kantri yet we i givim mani i kam inap nau em long Oil Ses Ltd we i givim K1,000, Difens Fos Ritaiaamen Fan K2,000, Pot Mosbi Praivet Hospitel (MOLA/Lam) K500, Nesenel Doktas

Asosiesen (Sauten rijen) K625 na Pasifik Fainens grup K2,000. Medikol Sosaiti yet i resim K4,000 long ol fan resing wok na kontribusen bilong ol yet.

Dokta Sapuri i tok Nesenel Kapitel Distrik Komisn bai givim helpim tu wantaim K28,000 long sponsorim opening nait long Park Royel long Septemba 3.

Em i tok program bilong bikipela bung na ol samting we bai kamap insait long wanpela wik i gupela bikos ol bai toktok long ol kain samting we i sut long helt bilong kantri, wol na rijen na ol medikol rises wok we ol dokta i kamapim na Helt Dipatmen insait long kantri bai yusim.

# RAMU SUGAR



## The Sweetest Thing



• Dispela ka em NCDC i save ronim long rot long brumim ol das na pipia long bik rot. Bos bilong NCDC Jamie Maxtone Graham yet i opim dispela ka long Mosbi tupela wik i go pinis.

## PNGBC bai kirapim telipon benking

PAPUA Niugini Benking Koporesen bai kamapim nupela rot long beng long en.

Dispela em long "Call Senta".

Call Senta em namba wan rot we beng i laik bihainim long rot bilong kirapim telipon benking.

Maski teknoloji na sevis i no wankain long stended bilong ol bikpela kantri long wol, dispela em namba wan taim PNG bai kamapim dispela rot long wokim benking long en.

Call Senta bai kamap pastaim na bihain long en, ol bai kamapim narapela rot we ol i kolim long Inteaktiv Vois Rispons (IVR) na Vois Rispons Sistem (VRS).

PNGBC Beng i laik kamapim dispela dispela rot long wokim benking long en bilong rausim

sampela hevi long planti wok we ol fran desk opisa i save wokim. Narapela samting tu em ol beng kastoma bai gat sans long painaut long ol samting we i sut long ol akaun na benking long telipon bikos i tambu long askim ol kwessten long ol dispela long fran desk.

Eksekutyutiv manesa long Consuma Benking na planti seholda bilong Konsuma Benking i sponsaim dispela projek. Ol lain long tripela han bilong PNGBC long siti, Grup Maketing na Beng Developmen grup i stap insait long em tu.

Ol bai kirapim Call Senta long Pot Mosbi brans Praioriti Benking i stap long en.

Taim na deit bilong kirapim dispela sevis em bai kamap taim ol

nupela wok long senisim opis long Image 2000 i pinis. Bai ol i trenim tu ol opisa long karimaut dispela wok bilong Call Senta.

Ol PNGBC kastoma husat i gat wanpela long ol akaun olsem trenseksen, sek, pesenel lon, FDL, IBD na Call akaun i ken yusim sevis ya.

Ol askim we ol kastoma inap long mekim long dispela sevis em long ol fail senis askim we i karamapim ol samting olsem putim stop long akaun, rikwes long stetmen na trense long mani long wanpela akaun i go long narapela. Foapela opisa na grup lida bai i lukautim Call Senta.

Sapos dispela sevis i wok gut, ol bai kirapim tu long ol arapela hap bilong kantri.

## Sik kilim ol kakaruk long Manus

VERONICA HATUTASI i raitim

FOTI-faiv (45) kakaruk i dai pinis long tripela kakaruk fam long Manus provins na moa dai i kamap we ol no ripotim yet.

Ol kakaruk ya i dai long wanpela kain sik we nogat man i save long en yet.

I kam inap nau ol Kwarantn opisa i karimaut ol wok painim long as bilong sik we i wok long kisim ol kakaruk long Manus na ol i dai long en.

Wankain sik i bin kamap long ol kakaruk long Bipi Ailan long 1994 tasol ol no bin painimaut as bilong sik bikos olgeta kakaruk i dai.

Ol ripot i kam long Manus i tok

long las wiken ol kwarantn opisa i bin karimaut inspeksen long tripela fam long nambis na inlen eria na painimaut long dispela ol kakaruk i dai pinis.

Ol fam i stap long inlen not Lorengau em long Ledemadiah na Bupi-Cheupeu Lokol Level Kaunsil eria na Rossun, Lundret na Bowat we i stap long inlen Manus. Narapela em long Lugos we i stap tupela kilomita longwe long Lorengau.

Ripot i tok ol no kisim ol ripot i kam yet long ol arapela eria we dispela birua i kamap long en.

Ripot i tok stat long las wik Fraide, Kwarantn opis long Manus i bin putim wanpela tambu long noken kisim ol kakaruk i go na i kam long ol ples long Manus.

Ripot i tok mak bilong luksave long dispela sik em ol kakaruk i go hap longlong, het bilong ol i hangkamap, kus i kamaut long nus na ol i pondaun i dai nating tasol.

Ripot i tok ol Kwarantn opisa i kisim ol sempel blut bilong ol kakaruk we i dai long traim painimaut as long sik we ol i dai long en.

Rijneldokta Veterineri opisa o dokta bilong ol animel long Lae Dokta Thompson i stap nau long Lorengau bilong karimaut ol kwarantn inspeksen na skruim tu ol arapela wok long dispela samting.

Ol opisa bai tokaut long risal bilong ol wok painimaut taim ol i pinisim ol wok long en

## Kokonas rises wok karim kaikai

WOKBUNG long rises wok namel long PNG Kakau na Kokonas Rises Institut (CCRI) na ol saientis bilong Frans i kamapim rot long daunim ol binatang nogut i save bagarapim ol kokonas na kamapim hevi long kopra bisnis long kantri.

Rises wok long dispela samting namel long CCRI na ol saientis bilong Frans i bin stat long 1992 na nau em i karim kaikai.

Siaman bilong Kopra Maketing Bod Robinson Namaliu taim em i bungim Ambaseda bilong Frans na delegeen bilong Yurop husat i stap insait long dispela wok i bin givim ripot long ol rises wok we Frans na CCRI i karimaut aninit long teknikal ejensi bilong Frans (CIRAD).

Mista Namaliu i bin tok bikpela hevi we ol kokonas long PNG i bungim em ol bagarap we tainoseres bitel o binatang i kamapim long ol kokonas diwai. Wanpela long ol bitel ol i kolim long Scapanes Australis em i ken kilim ol yangpela kokonas diwai bipo ol i gat faipela krismas.

Em i tok ol liklik fama long ples i save painim hat long long baim ol kemikol long kilim ol binatang bikos ol i kos bikpela mani na ol arapela rot tu i no daunim kos.

Tasol Mista Namaliu i amamas tru long nupela rot long kilim binatang we rises bilong tupela grup i

kamapim insait long faipela yia projek ol bin wok long en.

Em tok ol saientis bilong CCRI i kamap wantaim wanpela kemikol i gat smel bilong man Scapanes na ol saientis bilong Frans i bin kisim dispela long kamapim ekmokol long ol laboretori bilong ol.

Rot bilong kemikol long wok long en em putim em (pheromone kemikol) long ol hap we yu makim long kokonas diwai na meri bitel we i save kamapim bagarap bai i pas long trep ya na dai.

Long dispela rot, mak bilong ol binatang bai go daun na pinis na dispela bai sevim ol kokonas diwai na sid na kokonas bisnis.

Mista Namaliu i tok ol kopra growa insait long Is Nu Briten na ol arapela nambis provins long Niugini Ailans bai amamas na planim bek ol nupela haibrit diwai kokonas long ol plante-sen bilong ol bikos long dispela nupela rot bilong kilim ol binatang.

Em i tok CCRI nau i gat nem olsem ol arapela rises institut long wol wantaim luksave long dispela wok i karim kaikai.

Mista Namaliu i bin tok tenkyu long Ambaseda bilong Frans na askim em long skruim sapot bilong em long CCRI na teknikal helpim we tupela kantri i kisim gutpela samting long en.

# BIKPELA TOKSAVE

**NIU PRAIS** **30t**  
WANTAIM VAT



**TASOL PRAIS LONG DISPELA INO SENIS**

**20t** WANTAIM VAT  
**10t** WANTAIM VAT

**NOKEN BAIM MOA LONG OLGETA STUA**

# Politiks i mas stap longwe long haus mani

## WANTOK

NIUSPEPA BILONG YUMI OL PAPUA NIUGINI STRET


Gavman i mas kamap wantaim strongpela lo we i mas tambuim em yet long i no ken stap insait long wanpela wok o disisen bilong ol bikipela opis we i save lukautim mani bilong pipel na kantri.

Ol bikipela opis olsem POSF we i save lukautim mani bilong ol publik sevans wokmanmeri, PNGBC beng we ol manmeri i save putim mani bilong ol long stap gut. NPF we ol wokmanmeri bilong ol praiwet kampani na bisnis i save sevim hap potnait mani bilong ol na bikipela mama beng bilong kantri, Sentrel Beng we i save bosim mani bilong kantri.

Gavman i mas stap longwe long ol dispela opis bikos ol i mas mekim wok bilong ol stret na kamapim lo bilong ol long lukautim gut mani bilong ol pipel na kantri.

Ol dispela bisnis i kamap bikos haus palamen i pasim olsem lo we dispela kain opis i mas kamap long lukautim mani bilong ol pipel. Na gavman yet i save stap insait long ol olsem bosman tru we em i save makim husat wokman bilong em long go pas long ol dispela opis. Olsem na taim gavman i tok wanem long dispela bosman, em i harim tok na tokim ol wokman long mekim ol samting bihainim toktok bilong em. Tasol dispela i no tingting bilong em yet, em tingting bilong man i bin makim em long kisim dispela wok.

Bikipela piksa i kamap pinis long bikipela haus mani bilong NPF we planti tausen wokmanmeri bilong ol praiwet kampani klostu long 255,000 olgeta i save sevim mani bilong ol long em. Wok painimaut i soim pinis olsem moa long K100 milien bilong NPF i sua long han bilong gavman long ol wok bilong en. Olsem na yumi ken lukim stret olsem gavman i tokim NPF long



givim em ol dispela mani long em bai mekim wok wantaim. Tasol em i no bekim gut dispela mani na nau NPF i sot long mani.

Wankain tu long bikipela beng bilong Papua Niugini Sentrel Beng, gavman i bin kisim moa long K500 milien dinau long bipo na dispela i mekim mani bilong kantri i sot long dispela beng. Olsem na strong bilong PNG mani i no inap sanap strong wantaim mani bilong ol arapela ovasis kantri na dispela i bin pretim sampela ovasis bisnis na kampani hia long PNG long salim ol kago na saplai bilong ol long ovasis na opim pasbuk na lusim mani bilong ol long ovasis i stap. Bikos sapos ol i kisim dispela ovasis mani i kam bek long kantri, bai namba bilong dispela mani i go daun gen. Ol bisnis na kampani i pret long strong bilong mani i

go daun hia long PNG. Na dispela em asua bilong PNG gavman long mekim rong muv long mani bilong kantri.

POSF opis tu i bin tromoi ol bikipela mani bilong ol wokmanmeri long publik sevis i go long baim ol haus long Kens Australia. Tasol dispela haus i no wokim gutpela profit long bringim bek mani bilong ol membas.

Tingting bilong gavman i mas klia olsem em i nogat rait long kisim mani bilong NPF bikos i nogat lo bilong NPF long gavman i ken kisim mani bilong em.

Na tu gavman i no save givim wanpela liklik helpim long NPF long mani taim em i brukim baset bilong kantri. Tasol long POSF gavman i save brukim baset na givim liklik long helpim wok bilong POSF.

Tasol em i mas save olsem dispela em

wok bilong em long mekim na i no bilong paulim ol wokmanmeri bilong em gen long kisim mani bilong ol na tromoi nabaut long ol wok we i nogat gutpela kaikai long en.

Strongpela lo i mas kamap nau stapim na putim gavman na politik bilong em i stap ausait na longwe olgeta long wok bisnis bilong ol dispela haus mani. Bikos planti krismas i go pinis politik i bagarapim planti bikipela mani bilong ol dispela lain haus mani. Olsem na i luk olsem politik bilong PNG i no gutpela tru long sait bilong lukautim na kontrolim mani insait long kantri. Politik bilong PNG em i save aigris na ai op tasol long kisim mani bilong ol pipel.

Na long putim dispela mani i go bek, em i save hatim ol manmeri long baim moa takis long kisim bek ol dispela mani we ol yet i westim.

# Ol meri laikim strongpela lo egensim raskol

• Ol mama grup i singautim gavman long kamapim strongpela lo bilong mekimsave long ol bikipela raskol pasin we i save kamap na bagarapim ol meri na ol mama. Ol i laikim strong lo tru bilong mekimsave long ol trabel man olsem long katim bol bilong ol man nogut husat i save holim na bagarapim ol meri. Ol meri grup i mekim dispela singaut bihain long planti bagarap em ol meri i wok long bungim long han bilong ol birua o raskol lain long siti. Raskol pasin bilong kilim man i dai, bagarap meri na stil i bikipela hevi na pret samting insait long Mosbi, biksiti bilong Papua Niugini. Insait long las tupela mun i kam las wik, dispela birua i bin kamap moa we sampela raskol manki i bin hensapim wanpela man long ka bilong em long 6 Mail. Liklik pikinini boi bilong man ya i lukim birua na lusim ka na i go sanap ausait taim ol raskol i statim ka na tromoi man ya i go ausait. Tasol em i pundaun long rot we ka i ron antap long en. Long las wik tasol ol man nogut i bin hensapim wanpela meri i gat bel long Erima na bagarapim em. Wankain tu ol i mekim dispela bagarap pasin tu long wanpela meri husat i gat bel long hap bilong Konedobu.

Wanpela meri i tokaut tu olsem ol plisman i bin kisim em long ka na i go long sait bilong Erima we ol i bagarapim em, paitim em na bihain tromoi em i go daun. Em i kisim bagarap na i go long haus sik na

## OL HAP HAP nius

tokaut olsem ol bagarap em i kisim i kam long ol plisman husat i bin wok long dispela nait.

• Nesenel Kot i harim ileksen kot bilong olpela Praim Minista Sir Julius Chan egensim memba bilong Namatanai Ephraim Apelis na mekim disisen olsem i mas gat wok biung kaunim gen olgeta vot pepa bilong 1997 jenerel ileksen. Sir Julius Chan i bin lus long 1997 ileksen we Mista Apelis i winim tasol em i kisim dispela i go long kot aninit long 50 poin we em i ting i no stret long kamap bilong dispela ileksen long Namatanai ilektoret. Tasol taim ol kot jas i skelim olgeta 50 poin o toktok bilong Sir Julius Chan, ol i rausim olgeta na oraitim tasol 5-pela poin we ol i ting i mas gat wok bilong kaunim gen olgeta vot pepa bilong 1997 nesanel ileksen long Namatanai.

• Telikom opis i baim wanpela pistol na givim long siaman bilong en Pila Niningti. Dispela pistol i kos olsem K5,000. Mista Niningti i tok bod i luksave long dispela na

oraitim em long gat wanpela pistol we em bai i stap olsem propeti bilong Telikom. Mista Niningti i tok dispela pistol i olsem sekyuriti bilong em bikos em i gat rait long gat sekyuriti bilong em. Na Telikom bai tromoi bikipela mani moa sapos em i baim ol praiwet sekyuriti long mekim dispela wok.

Insait long Telikom yet, gavman i rausim pinis eking menesa bilong Telikom Lindsay Lailai long toktok bilong mani i paul. Ripot i tok Mista Lailai i bin raun long ovasis na yusim sampela mani we ol i no klia em i gat rait long yusim o nogat. Na tu bod bilong Telikom i oraitim Mista Lailai long yusim dispela mani o nogat.

• Plis long Mosbi i painim wanpela liklik bebi long ples Hanuabada we em i dai pinis. Plis ripot i tok dispela bebi em mama i karim nupela tasol na tromoi em i go daun long ples pipia we ol asples i lukim na kwiktai ripot long plis.

Plis i go insait long ples Hanuabada na kisim bodi bilong dispela liklik bebi we han na lek bilong em i lus pinis.

Plis i tok dispela em i bikipela trabel na ol bai sekim gut ol meri na mama long Hanuabada husat i bin gat bel long sampela taim i kam. Plis i tok dispela hevi em i stap long sas bilong kilim man i dai.

• Plis Minista Mathias Karani i givim

bikipela tok lukaut i go long ol pipel bilong Asaro veli husat i wok long holim bikipela pait i stap nau. Tupela ples o klen ya em Kanosa na Andawayufa. Mista Karani i tok dispela pait i mas pinis nau bikos sapos pait i go het yet, bai ol plisman i go insait long tupela ples wantaim na karimaut wok bilong lo na oda aninit long wanpela nupela lo ol i kolim Inta Grup Faiting Ekt. Dispela lo bai givim pawa long ol plisman long go insait long ples na mekim wok bilong ol na holim ol trabel lain na sasim ol long mak olsem 20 yia long haus kalabus.

Mista Karani tu i surukim wankain toktok bilong stapim pait na birua i go long ol ples lain bilong Onamunga insait long Kainantu na tu long ol pipel bilong Omaura long Obura Wonenara ilektoret. Olgeta dispela ples em insait long Isten Hailans provins yet. Praim Minista Sir Mekere Morauta tu i givim dispela oda long Mista Karani long bungim ol dispela ples i stap long pait long stapim pait na kamap wantaim gutpela rot na plen bilong pinisim hevi.

• Gavana bilong Sandaun provins John Tekwie i tokaut long palamen dispela wik olsem em i no bin brukim wanpela kot oda. Mista Tekwie i tok em i bin bekim pinis mani bilong kakaruk we em i kisim long wanpela man. Mak olsem K1,000 na tu ol interes wantaim.



• Sempion tim, Gazelle i kisim foto bipo long gren fainel gem egensim AB Bears las wik. Gazelle win 9-1.

### Gazelle wilwilim stret AB Bears

#### FOR MENS SOF BAL RIPOT

GOLD Cup Gazelle i waraim stret AB Bears 9-1 long winim gren fainel bilong Pot Mosbi mens sof bal resis long wiken.

Dispela wik em i namba 14 bilong klab, na em i rekot insait long Pot Mosbi sof bal kompetisen ya.

Pitsa Patrick Pilak husat i kamapim gutpela pitsing i go pas long dispela win bilong Gazelle.

Ol yangpela AB Bears i kamapim wanpela gutpela pilai long gren fainel. Maski ol i save ol i no inap win, ol i givim gutpela salens tru long ol eksperiens pilaia bilong Gazelle long fainel.

Bears i statim gut kempen bilong ol taim yangpela Bobby Bais i paitim wanpela hom ran. Dispela em wanpela poin tasol bilong AB Bears.

Tasol Gazelle i kamapim strongpela gem stret long stapim ol long rekotim moa poin insait long arapela ol ining.

Dispela hom ran i no bagarapim Pilak, nogat, em i kirapim stret skin bilong em na em i wilwilim stret ol beta bilong AB Bears. Mausgras pitsa ya i rekotim 11-pela straik-aut olgeta na Ansaletm Bunbun i rekotim 4-pela tasol.

Ol pilaia bilong Gazelle husat i kisim K2 long Bunbun em Luke Waldiat, Peniel Eliab, Paskalis Pina na Pius Martin.

Pilak i rejistarim 11-pela K2 long we Danny Amen i kisim tupela K2 olgeta.

Dispela win em i gutpela stret bikos

long mesa semi, AB Bears i autim Gazelle 4-2 long sambai long gren-fainel.

Albert Jerry i brukim kiau long levelim skoa bilong AB Bears taim em i kam hom bihain long wanpela asua bilong ol Bears infila pilaia.

Jerry i stap long namba wan bes. Em i stilim namba tu bes na taim ol i laik tromoi bal long autim em long namba tu bes, ol i tromoi bal i go krangi na em i winim bes. Orait dispela bal i no gut na em i winim namba tri bes we Bobby Bais i no tromoi gut bal na em i kam hom ya.

Insait long namba tu ining, Pilak i kamapim strongpela pitsing stret. Em wantaim Peter Urari i autim Tul Malisa, Danny Amen na Robinson Penias na nogat wanpela skoa i kamap.

Ol arapela ining tu wankain we Patrik i stapim ol pilaia bilong AB Bears long noken tru skorim wanpela ran.

Gen ya i gutpela taim Gazelle i skorim 8-pela arapela ran i kam long Peter Kaminiel, Peter Urari, Harry Mathew insait long namba tri ining.

Long namba foa Kaminiel i skoa gen, Urari, Mathew na tu Jerry na Tony Daple long namba faiv ining.

Bears i gat sans long namba 7 ining taim ol pilaia olsem Felix Barai, David Taule na Rolland Menring i stap long bes tasol Patrick Pilak i stapim ol long kam hom wantaim gutpela pitsing.

Kaminiel i winim Bes na Feres awot, Pilak i kisim bes pitsa awot, Daple i kisim top beta awot na Joe Avuchulas i winim bes autfida awot na Bobby Bais i kisim bes infila awot.

### Scorpions kaikai stret Hoppers

#### NCD VOLIBAL RIPOT

SCORPION tim i soim tru ol arapela tim olsem ol i mas iingting taim ol i bungim ol insait long NCD volibal resis.

Las wik ol i soim olsem ol i ken pilai gutpela volibal taim ol i nekim ol boi Hohola, Hoppers 3-2 na winim dispela gem. Dispela ol gem i kamap las wik tu i makim pinis bilong namba tu raun.

Insait long arapela A gret gem, Telikim i wilwilim stret Raukele 3 sets na riserv mens gem

U-Mi-yet tu i mekim wankain skoa egensim Elvai 3 sets olgeta.

Long resis bilong ol meri, NCD i autim Mixtures 3-2. Na riserv gret Elvai winim U-Mi-Yet 3 sets, Raukele i 3 sets long autim Telikom tu.

Insait long bikpela gem bilong Scorpions na Hoppers, ol boi Scorpion i no westim taim. Ol i go na tupela ol pilaia olsem Kala Walo na Rucky Ane i mekim ol gutpela spaiks long ol birua bilong ol.

Tupela i kisim gutpela sapat long ol pilaia bilong ol na win 25-19.

### Bara em kwin bilong LFA pri-sisen

#### LFA W IMENS RIPOT

#### FRANCO NEBAS i raitim

STAIL straika Edna Thomas i sutim tripela go long helpim tim blong em Bara long winim Lae Futbol Asosiesen pri-sisen soka taitel las wik Sande. Bara wilwilim stret Mopi 4-0 long Lae Futbol Asosiesen Pak.

Thomas em wanpela pilai i save kamapim kain stail we i save bagarapim tru sindaun bilong ol birua tim.

Thomas husat i mekim kam bek bilong em long dispela yia i luk moa nogut taim bal i stap long lek bilong em.

Namba wan gol bilong em i kamap bihain long em i kisim wanpela gutpela bal i kam long poro straika bilong Freda Jack na em i sutim dispela gol.

Nmaba wan gol ya i kamap 15 minit insait long namba wan

hap. Bara i bin luk strong moa we i brukim Difens bilong Mopi olgeta taim wantaim bal i go insait long eria bilong ol.

Dispela i lukim namba tu gol i kamap bihain long midfilda Helen Nesep i kikim wanpela hai bal we gol kipa Antonio Anio i skelim karangi na lukim bal i abrusim em i go insait long net.

Mopi i traim iat long pait bek tasol difens bilong Bara i strong na i save stapim ol meri Mopi.

Intanesenel swipa Wantin Yangum na stopa Kessie Towika i pasim olgeta rot long ol yangpela straika bilong Mopi olsem Sophia Anio, Sumi Daniel na Alice Gedion long skoarim gol.

Skoa i sanap 2-0 long hap taim. Mopi i kam bek strong long namba tu hap tasol ol i no strong tumas long wanem nogat gutpela sapat pilai na kombinesen long midfil.

Bara i lukim dispela na i go het long putim moa presa i go long eria bilong Mopi.

Long dispela taim nau Thomas i skoarim. Wanpela gol bilong em i kamap bihain long em resis winim difenda bilong Mopi na gol kipa long skoarim namba tu gol.

Namba foa gol bilong em i lukim em salens wantaim gol kipa na hetim bal i go insait.

Mopi i traim olgeta rot long brukim kiau tasol taim i sot na karim bikpela kiau i go long haus. Ol pilaia i taitim bun long sait bilong Mopi em Saunga Gorgom, Gabbie Koris long beklain, Lavinia Anio, Sophia Anio long midfil na Alice Gedion long straika.

Long arapela wimen gem, Blu Kumuls i autim Poro 6-4 long penalti sut aut bihain long skoa i sanap 2-2 long ful taim long winim namba tri ples.

Long man divisen, Buresong i autim Uni Bulolo 1-0 long mesa taitel, HC West kisim namba tri ples bihain long autim Blu Kumuls 2-1.

### Souths dro wantaim Tigers

#### FOR LIG RIPOT

D O W N E R Construction Souths i kamapim wanpela strongpela pilai stret na dro wantaim Kone Tigers 22-22 insait long Pot Mosbi ragbi lig resis las wiken.

Long haptaim Kone Tigers i go pas wantaim skoa 10-4. Tasol insait long namba tu hap ol i pilai strong tru na putim foapela trai long dro wantaim Tigers.

Ol boi long Kone oval i skorim tupela tasol na kikim wanpela konvesen kik we i go insait na ol i dro. Long namba tu hap, winga bilong Souths Billy Jim i skoa aninit stret long gol pos. Em i kisim gutpela bal i kam long ol wan pilai bilong em na skoa.

Tasol hapbek bilong Tigers Aua Eno i kamapim sampela gutpela trik long go skoa.

Faiv-et bilong Tigers Karo Mabua i kikim penalti long surikim skoa bilong ol boi Kone i go long 18-10.

Tigers i gat gutpela sans long surikim skoa moa yet taim ol i kisim penalti. Tasol ol i no tingting gut na bihain liklik long skram, Souths i winim ol na skoa. Souths i kamapim gut gem. Ol pilaia bilong i pilai strong tasol ol liklik asua tasol i wok long bagarapim gem bilong ol.

Kepten bilong Souths Wayne Moary i go pas long tim ya. Em i wok long setim ol fowat bilong em olsem David Kaiabe, Eric Abba, Luke Minjuku na

Jackson Etave husat i wok long winim bikpela graun taim ol i holim bal.

Ol i mekim dispela kain pilai na Mal Tumbe i skorim wanpela gutpela trai long surikim skoa i kam daun 18-14.

Tigers i no difend gut na faiv-et bilong Souths Ravu Tala i karim tripela pilaia bilong Tigers long baksait bilong em na go skorim trai long levelim skoa long 18-18. Lock bilong Tigers Chris Lome, Vincent Okole na John Koava i kamapim strongpela pilaia long stapim ol pilaia bilong Souths.

Tigers i skorim wanpela trai gen long go pas long skoa 22-18 tasol Souths i levelim gen na ol i dro 22-22 long fultaim.



IKEN WOKIM GUTPELA SAMTING LONG YU



• (Antap): Ragbi yunion eksen namel long riserv gret bilong Royals na Harlequins long Pot Mosbi ragbi yunion resis las wiken long Bava Pak.

• (Raithan): Veronica Mola (namel) bilong Rebels i resis wantaim birua bilong em long kisim bal long Pot Mosbi netbal resis.



• (Raithan): Fulbek bilong Cosmos (Iephan) i rausim bal long mak bipo long straika bilong Togelu Rachel Towamwesi i skorim gol. Cosmos waraim ol susa long Milen Be 4-0.



• (Antap): Winga bilong Lewamani i givim siksti long Pot Mosbi tas resis long Insevis Koles fil las Sande. Fainels bilong tas nau i wok long kamap klostu nau.



• (Raithan): Beta bilong Brown Eagles B gret i laik traim paitim bal egensim pitsa bilong Tisa Jets long Pot Mosbi sofbal grenfainel las wik. Ol boi Tisa Jets win 16-10 na bai pilai long A gret neks sisen.

OL poto: Issac Ikuavi



# Presiden amamas long pri-sisen fainel

## LFA RIPOT

### SAPE METTA i raitim

PRESIDEN bilong LAE Futbol Asosiesen (LFA), Igoning Kwaliang i bin kamap wantaim bikpela amamas tru taim asosiesen i bin pinisim gut ol pri-sisen grenfainel pilai las wiken.

Long pilai bilong ol meri, Bara i winim Mopi wansait 4-0 na long gem bilong ol man, biknem tim, Buresong wantaim ol yangpela bilong em bagarapim sindaun bilong Uni Bulolo long winim pri-sisen taitel.

Bihain long lukluk long dispela tupela pri-sisen fainel presiden i tok stendet bilong pilai i kamap gut na em i laikim olgeta tim i mas i stap long dispela stendet i go inap sisen i pinis.

Em i amamas tu long ol sapota hsuat i bin sindaun gut na lukim ol pilai i go inap long pinis.

Presiden i tok olgeta samting i go stret tasol wanpela samting tasol em sponsa bilong LFA. Asosiesen i no save kisim sponsa long pri-sisen long sampela taim nau tasol dispela i no stapim en long go het long holim pri-sisen soka resis.

Em i tok asosiesen yet i bin kamap wantaim ol prais mani na tropi long presentim i go long ol tim hsua ti tekpat long prisisen 2000 kompetisen.

Mista Kwaliang i tok planti ol yangpela pilai hsuat i mekim we bilong ol i kam antap long sinia level i wok long pilai gut insait long ol wanwan klab bilong ol.

Em i tok i gat ol representativ gems bai kamap insait long dispela yia long kantri na long ovasis tu na em i laik lukim ol yangpela pilai bilong LFA i mas stap insait long dispela tim bilong man na meri.

Na long narapela sait bilong lokol soka kompetisen, Mista Kwaliang i tok long bipo LFA Pak em i wanpela top asosiesen insait long kantri we i bin igat ol gutpela graun fesiliti olsem gren sten, sait sten, toilet, edministretiv opis na ol arapela samting we LFA i save yusim long karim aut ol wok bilong en.

Tasol ol dispela fesiliti i no moa i stap bikos long bikhet pasin em ol ausait lain i save mekim ong rausim ol banis na kapa na karim i go nabaut.

"Ol dispela bikhet lain i save mekim olsem na LFA i lusim pinis planti mani long traun na stretim ol dispela bagarap em ol i save kamapim Mista Kwaliang i tok.

Em i tok dispela bikhet pasin em ol lain i save i stap klostu long LFA Pak i save kamapim

Presiden i askim ol lain slip na save klostu long LFA Pak long noken rausim na bagarapim ol samting bilong LFA.

# Lapun Buresong i wip yet long soka fil

## LFA MENS RIPOT

BURESONG em i sempion tim bilong man long Lae Futbol (Soka) Asosiesen (LFA) prisisen bilong dispela yia.

Lapun bilong LFA i autim ol yangpela bilong yunivesiti long Bulolo 1-0 long winim dispela taitel las wik Sande

Dispela fainel i pulim planti soka sapota na pulap stret long ples pilai, LFA Pak

Long gren fainel bilong ol meri, sempion wimen klab Bara i wilwilim yangpela Mopi 4-0 long kisim taitel.

Gem namel long Buresong na Uni Bulolo i lukim strongpela soka gem i bin kamap namel long tupela sait wan-

taim  
Tupela sait wantaim i bin pilai hariap tru long namba wan hap bilong pilai. Buresong husat i moa eksperiens i yusim ol teknik bilong ol i lukim pes gol i pairap long umben bilong ol skul mangi.

Dispela gol i kamap long gutpela midfil kombinesen we i lukim straika Ricky Wenziong

i kikim wanpela bai long skoarim gol tasol gol kipa sevim na Micah Passingan kisim dispela lus bai long skoa.

Dispela gol i mekim Uni skin kirap na i no isi long putim presia i go long eria bilong Buresong tasol difens bilong Buresong i strong olsem simen wol ya.

**SLAM DUNK NA WIN!**

**Nestlé MILO**

**5 BIKPELA MILO SPOTS PACKS BILONG WINIM!**

WANTAIM: BASKETBALL BACKBOD, MILO SPOTS BAG, MILO BASKETBALL, MILO T-SHIRT, WARU BOTOL NA KEP, NA K100 KES MONI!

### EM I ISI TRU LONG JOINIM RESIS



Raitim nem na adres bilong yu long baksait bilong wanpela Milo label

or film wanpela entri lom na pulim wantaim wanpela Milo label or sofpak

igo insait long wanpela envelop na salim ikam long Milo Slam Dunk na Win Locked Mail Bag, Boroko NCD

or putim insait long Redpala Nestle Entri boks long ol situ husat i sapotim dispela resis

NEM: \_\_\_\_\_ KRISMAS: \_\_\_\_\_

ADRES: \_\_\_\_\_

TELEFON: \_\_\_\_\_

### OL RULS BILONG BIHAINIM LONG RESIS

- Olgeta manmeri na pikinini bilong PNG iken pilai long dispela resis. Tasol ol wok manmeri bilong ol agensi bilong Nestle wantaim famili bilong ol bai NOGAT.
  - Nestle (PNG) bai salim toksave igo long ol prais winas long leta na nem bilong ol bai igo insait long National na Wantok niuspepa.
  - Ol manmeri husat i winim prais i mas soim ID kat
  - Ol wina ino inap les long prais na askim long kes moni.
  - Ino inap asua bilong Nestle sapos prais i lus, or prais igo long narapela hap or leta ino go hariap.
  - Ol wina i mas kisim prais olsem Nestle i givim na bai ino inap senis.
  - Sapos hevi i kamap, Nestle husat i kamapim dispela resis, bai mekim lainol disisen.
- Na olgeta entris bai kamap samting bilong Nestle.
- Bai igat faivpela (5) wikli dro na bai igat wanpela wina tasol long wanwan dro
  - Dro bai kamap long ai bilong ol polis
- 7pm EMTV taim bilong Dro:
- |                 |                  |
|-----------------|------------------|
| 1 st Dro Friday | 28 th April 2000 |
| 2 nd Dro Friday | 5 th May 2000    |
| 3 rd Dro Friday | 12 th May 2000   |
| 4 th Dro Friday | 19 th May 2000   |
| 5 th Dro Friday | 26 th May 2000   |
- \* Prais bilong winim bai yupela ol wina i kisim olsem mipela i advetaisim
- RESIS BAI PINIS LONG FRAIDE JUN 2ND, 2000

# MILO IKEN WOKIM GUTPELA SAMTING LONG YU

**Nestlé MILO IKEN WOKIM GUTPELA SAMTING LONG YU**



# Demokretik Muvmen laik rausim gavman bilong Presiden Mugabe

## Zimbabwe, Afrika:

Ol waitman politikel ektivis bilong Zimbabwe i tok strong olsem ol bai pait strong (long maus) bilong rausim gavman bilong Presden Robert Mugawe. Dispela em long nesanel ileksen we kantri bai i gat long dispela yia.

I gat ripot olsem ol hevi bai kamap na ol asples skwata

lain bai bagarapim na tekova long ol fam bilong ol waitman long Zimbabwe.

David Coltart husat i wanpela humen raits loya na eksekutiv memba bilong oposisen pati Muvmen for demokretik Senis (MDC) i tok ol i wokim dispela ol pret toktok bikos gavman bilong Presiden Mugabe i pret long

lusim pawa. Na ol arapela korap pasin na ol wok long bagarapim humen raits we i kamap aninit long gavman bilong em baiu kamaut long ples klia sapos gavman bilong em i lus. Mista Coltart i tok.

Tasol Chengjera: Hitler Hunzvi, lida bilong Zimbabwe Nesanel

Liberesen Wo Veterens i tok em bai go pas long wok bilong tekova long ol fam we ol waitman i papa long en. Na MDC bai i no inap longkamap olsem gavman bilong Zimbabwe.

Ol ripot i tok Presiden Mugabe i tok husat lain i laik brukim ol pipel long namel o ol liklik grup bai dai

# Japan gat nupela Praim Minista

## Japan:

Japan i gat nupela lida. Nem bilong en em long Joshiro Mori na em i gat 62 krismas. Em i memba bilong Liberel Demokretik Pati.

Praim Minista Mori i kism ples bilong Keizo Obuchi husat i gat bikpela sik na palamen long las wik i bin vot

long makim nupela man long kism ples bilong Presiden Obuchi.

Long las Sande, Mista Obuchi i bin gat bikpela hat atek na em i stap yet long haus sik.

Nupela Presiden Mori i bin kism sapot long Lowa na

Apa haus na long 488 vot olgeta, em bin winim 335 mak na dispela i soim strongpela sapot long en.

Em i tok bikpela wok bilong em nau em long staim gut na strongim wok mani bilong Japan long gro gut. Ol narapela bikpela samting we em

bai lukluk long ol long dispela taim em long maunten paia Usu na wokabaut bilong nupepa lida biulong Rasia Presiden Vladimir Putin husat bai mekim wokabaut i go lukluk raun i go long Japan sampela taim long dispela yia.

## Liklik manki i gat nem!

### Amerika:

Nau Vais Presiden bilong Ameriak Al Gore i go insait long dispela keis bilong liklik Elian we stat yet long las yia Novemba yet, nem na nius bilong em i pairap bikpela na klostu i kamapim hevi namel long Cuba na Amerika.

Mista Gore i sapotim kempein long Elian i mas stap long Amerika wantaim ankel, bubu na ol arapela hauslain bilong em long Florida. Tasol Presiden Bill Clinton na kot i laikim bai manki ya i go bek long papa bilong em long Cuba. Ol bin painim Elian long solwara klostu long Florida las Novemba bihain long 10-pela narapela na mama bilong em i bin dai taim bot i kapsat. Ol bin wok long go long Amerika taim birua ya i kamap.



• Bubu meri i givim kis long liklik boi Cuba Elian Gonzales husat i gat siksipela krismas tasol nem bilong em i pairap long intenesenel nius. Piksa i kam long Weekend Australian niuspepa.

# 500 kago kalt memba dai long Uganda

Ol bin painim moa long 300 dai bodi bilong ol kago kalt muvmen memba i sting i stap long ples Kanungu we i stap long wes Ugand. Afrika long las wik.

Ol i painim ol bodi bilong ol pikinini na ol bikpela manmeri long ol hul, sampela aninit long haus bilong ol kago kalt lida.

Ol ples lain i kirap nogut tru long dispela samting, tasol ol i bilip olsem moa dai bodi i stap yet. Pastaim 350 pipel long Kanuga yet i bin dai taim paia i kukim wanpela sios. Ol i bilip olsem mak bilong ol daiman bai abrusim 500.

Dispela em ol lain bilong wanpela lotu kago kalt grup ol i kolim long "Muvmen bilong Restoresen ov the Ten Komanmen".

Long las wik, ol man i kamautim sampela moa bodi long hul aninit long haus bilong wanpela Katolik pater husat i bin stap insait long dispela kalt grup. Pastaim ol painim siksipela bodi long hul aninit long haus bilong wanpela long ol kalt lida. Bihain ol i painim 153 bodi na planti bilong ol em ol pikinini. Ol bin painim ol aninit long flua bilong trensit kem we i stap 50 kilomita longwe long sios. Bihain gen ol i painim 81 moa bodi aninit long haus bilong foma Katolik Pater Dominic Kataribaabo husat i gat digri bilong tiloji long Yunivesiti bilong Kalifonia.

Ol bin painim narapela 74 bodi gen long gaden banana long baksait bilong haus. Ol plis i tok ol bai digim yet

tripela moa hap we ol i save olsem ol bodi i stap long ol. Ol atoriti i wok long kism yet ol nius long ol kalt membana lida tasol planti bilong ol i dai pinis na sampela i ronawe. Tasol i luk olsem nius long dispela samting i no luk gut.


Ripot i tok lida bilong dispela kalt grup em wanpela foma Katolik skul tisa, Joseph Kobweterere husat i kism ol statok long wanpela foma pamuk meri, Credenia Mwerinde. Meri ya i tok em bin save lukim na kism ol toktok long Mama Maria na olsem em bin pulim ol memba i kam na ol i wokim kalt lotu bilong ol long graun bilong em long Kanungu. Ol memba i bihainim ol strik rul olsem givim olgeta mani samting bilong ol long kalt,

no inap long toktok bikpela na ol mas stap kwait na toktok long sain, ol manmeri long noken slip wantaim olsem ol marit na tokaut olsem pinis bilong wol i klostu na ol builip manmeri tasol em bai God i sevim ol.

Ripot i tok i luk olsem planti ol bin tanim nek bilong ol na ol i dai long sampela mun i go pinis. Na i luk olsem ol lida i bin pret bikos wol i no pinis long Janueri 1,2000 na ol i kilim dai ol kalt memba. Dispela em long wanem ol memba i bin laikim bek ol mani na propeti samting.

Ol ripot i tok ol bin haitim gut stret dispela birua long ol atoriti tasol nau Presiden Yoweri Museveni i tok ol i karimaut ol wok painim long dispela samting nau.

# Maunten paia Usu i autim kros!



• Dispela smuk i kirap pastaim bipo long maunten i pairap. Piksa i kam long Weekend Australian niuspepa.


## Japan:

Maunten paia Maun Usu long Japan i pairap na autim bikpela klaut smok. Nogat man i bin dai long en bikos moa long 15,000 husat i stap klostu long mauntenpaia ya i bin ronawe lusim ples bipo long birua i kamap. Tasol ol ripot i tok ol saientis i tok bai maunten paia ya i gat wanpela bikpela pairap yet

na ol pipel i mas sambai na was long birua.

Ol i gat bilip long dispela samting bikos ol hul i wok long kamap nau we i mak bilong bikpela pairap bilong amunten paia ya long sampela taim i kam. Na dispela i ken bagarapim planti eria long Noten Hokaido we maunten paia i stap long en.

# Tupela brata bung bihain long 60 krismas



• Clive na Ernest Lowe, tupela brata i bungim wanpela arapela bihain long 60 krismas. Piksa i kam long Courier Mail niuspepa.

Ernest Lowe i bin gat 13 krismas taim ol atoriti long Ingran i bin putim ol pikinini long sip i lusim London long 1940 bikos Jemeni i wok long bomim ples long Wol Wo 2.

Olsem na Ernest i bin wanpela long ol i kalap long sip SSNester na go long Australia wantaim planti ol arapela pikinini. Ol i kolim ol dispela pikinini long "Leaving ov Liverpool" pikinini. Olsem Ernest, bin lusim ol famili

bilong ol bek long Ingran na no lukim ol o tingim ol. Famili bilong Ernest i bin gat foapela brata na wanpela susa. Ol bin putim Ernest wantaim ol arapela pikinini long ples we ol save luakutim ol pikinini long Australia. Bihain long wanpela kasen bilong em i mekim wok painimaut long famili tri, ol bin painim Ernest na nau em i amamas long save long famili bilong em long Ingran.

Suva, Fiji:

## Fiji ami bos no sapotim tekova

Fiji ami i tok em bai no inap long go insait long wok birong tekova long gavman olsem dispela we i bin kamap long kantri long 1987.

Dispela i bihainim ol toktok we i wok long kamap nau olsem wanpela asples Fiji grup i tok militen tekova long gavman bai kamap long Fiji i no long taim nau.

Em i tok samting i kamap olsem bikos Praim Minista Mahendra Chaudhry i no luksave long sampela ol tambu samting bilong ol asples Fiji, moa yet long Great Kaunsil ov Siefs na Native Land Trust Bod. Na olsem long las wik, Apisai Tora lida bilong asples Fiji presa grup, Taukei Muvmen i bin karimaut wanpela tok lukaut na tu askim Fiji ami long helpim kirapim dispela militen tekova.

Tasol Komanda bilong Fiji ami Kenel Ratu George Kadabulevu i tok ami bai i

no inap sapotim askim bilong Mista Tora bikos laik bilong planti pipel bilong Fiji na ol bin votim gavman bilong Fiji nau long las yia we wanpela Fiji Indian, Praim Minista Chaudhry i go pas long en.

Komanda Kadabulevu i laik mekim klia long pablik olsem ami i no sapotim dispela samting na pablik long kantri na intenesenel komyuniti i noken pret bikos ami bai no inap go insait long tingting bilong Mista Tora.

Leba Minista Ratu Tevita Momoedonu i belhat long Taukei Muvmen long traim kamapim hevi na bruk long gavman na tu long gutpela sindaun insait long Fiji.

Em i tok Mista Tora i mas go bek long ples na wokim gaden na lukautim fam bilong em na maski long westim taim long pilai politiks na kamapim hevi long gavman.

Solomon Ailan:

## Pis plen long daunim hevi long Solomon Ailan

OL KOMONWEL Pis negosieta wantaim Nu Silan na Australia i wok bung wantaim long traim stretim dispela hevi insait long Solomon Ailan we klostu i laik tanim i go long bikipela wo long kantri.


Olpela praim minista bilong Fiji Sitiveni Rabuka husat i go pas long Komonwel long ol toktok bilong stretim hevi long Solomon Ailans na deputi bilong em Ade Adefuye bilong Nigeria i bin kamap long Solomon Ailan long dispela wik long skruim ol toktok bilong stretim hevi namel long ol Guadalkanal na Malaita pipel. Ol ripot i tok dispela pis toktok plen we Nu Silan na Australia i plenim long kisim ol

lida bilong ol grup na Komonwel pis negosietas long wanpela ples bilong toktok i wankain olsem dispela we i bin kamap long Bogenvil pis toktok long 1997 taim Nu Silan i kisim ol pait grup i go long Nu Silan long wanpela wik na ol i toktok.

Hevi long Solomon Ailans i bin stat long las yia Me taim sampela yangpela bilong Guadalkanal Ailan i bin fomim wanpela pait grup ol i kolim long Guadalkanal Revoluseneri Ami na apit long rausim ol Malaita pipel long Honiara. Bihainim dispela pait namel long GRA we bihain ol i senisim nem i go long Isatabu Fridom Paita na pait grup we ol yangpela bilong

Malaita i fomim, samtin g olsem 40 pipel i dai. Na 20,000 Malaita pipel i ronawe lusim Honiara. Honiara em bikipela taun bilong Solomon Ailan na em i sanap long Guadalkanal. Ol Guadalkanal paitman i wok long rausim ol Malaita bikos ol i tok ol Malaita lain tasol i laik tekova na bosim ol bikos olgeta bikipela wok long gavman na praivet sekta em ol Malaita pipel i holim.

Guadalkanal i stap klostu long Bogenvil we hevi i stap long en long las 12-pela krismas. Tasol hevi i narakain bikos Bogenvil i wok long pait long bruk lusim PNG na hevi long Solomons em tupela wanpisin grup i gat belkros long wanpela arapela.



**LAE CITY COUNCIL**

### ZONE 1

MONDAY & THURSDAY

*Location and Area Covered*

## GARBAGE COLLECTION SCHEDULE

• Lae Technical College Staff/Students • LFA • Admin Compound • YWCA • Christian Academy • All of Cassowary Road • Aviat • Lae Court House • Anglican Church • Seventh Street • Sandpiper Road • Kingfisher • Bowerbird Roads • Huonville Shopping Centre • Business and Industries • Mt. Lunaman • Chinese Club • Pistol Club • Nestles • Colgate • Voco Point • Lutheran Shipping • Dickson Doors • Beltek • Airways Avenue Residents • Asiawe Village • Stadium • Lae Rugby League • Angau Hospital • Forest Research Institute • Lae Clinic • SDA Mission • Coronation Drive • 12th - 1/2 Street • Top Town CBD • Hospital Quarters • Coronation International School • Melanesian Hotel • Post Office • Lae City Council • Second Street/YWCA Girls Hostels • Lae International Hotel • Aircops Road • DCA Point • SP Brewery • All of Section 7 Residents • Mobil and Shell Depots • Stephens Trading • All Business Industries • Residents on Aircorps Road • Macdhuil • Speybank • Malekula • Malaita and Mangola Street • PNG Halla • Main Wharf • Zifasing Freezer • Toba Motors • Boroko Motors • Rice Industry • Kwantung Restaurant • Lings Freezers • Dunlop • Aircorps Road • Business and Industries included • Lae Hockey Field.

### ZONE 2

TUESDAY & FRIDAY

• Boral Gas • Niutrans • NGI Coca Cola • Consort Shipping • And Wholesale and Freezers • BHP Lysaght • Harbours Quarters • Courts • Huon Electrical • Markham Haus • Hasting Deering • NGI Steel • Malaita Street United Church • Papuan Compound • Milfordhaven School • Health Centr • All Residents • Business and Industries on Morobe Avenue • Abel Tasman Street • Josey Street • Golden Rooster • Pelgens Wholesale/Freezer • Ela Motors Sales • Steamships Hardware • Stephens Trading • ABCO • BP and Mobil Service Stations • St Pauls Church • Lae Show Ground • Jawani Street • Homes for Disabled • Salamanda Housing • Bugandi Secondary School • Lae Fire Service • Kwila Road Residents • Bumbu Road Residents • Lae Golf Course • Bowling Club • Boys Scouts • St Michael's Catholic Church • St Mary's Primary School • Eriku Shopping Centre • Eriku Housing Area • Salvation Army • AOG Church • Bulae • Lae High School • Lae Police Barracks • Buimo Road Housing • Lae International High School • Timber College • Lae Abattoir • CIS Buimo • SP Village • Boundary Road Housing • One Mile • Markham Road School • Section 212 • Bugandi Service Station • SDA Mission • 2 Mile Haikost • Three Mile and Four Mile

### ZONE 3

WEDNESDAY & SATURDAY

• Omili Residential • Schools and Business Houses • Omili Industries • Central Taraka Industries • Business Houses • West Taraka • East Taraka Residential and Business Houses • University Campus Staff and Students and Employees • Taraka Community School • Taraka Police Station • Bumayong Secondary School and Business Houses • Igam Barracks Officers and Residential Houses • PTC Training Centre - Staff, Students and Employees

*Note: This schedule is inclusive daily services rendered to the following on different rate*

1. All major shopping and office complexes
2. Major wholesale and retail outlets
3. Major supermarkets and butcher shops
4. Major manufacturing industries and factories
5. Major hotels, motel and licensed clubs
6. Restaurants and Takeaway food bars
7. Lodging Hostels and Houses
8. Learning schools and institutions
9. Disciplinary and Corrective institutions
10. Hospital and Health Centres etc..

# LAIPSTAIL

## Gavman i mas kamapim moa wok long pipel

### MASTA WAI i raitim

Painim wok bilong mekim na kamapim mani o kism potnait em planti manmeri i save ting em wok mani tasol. Planti manmeri i save ting yumi mas wok long opis olsem kuskus, ol kapenta, taipis, loya, draiva, selsman wok long benk na planti arapela wok. Dispela em yumi save tok wok mani bikos bai yumi kism potnait pe na long olgeta potnait Fraide. Sampela i save kism potnait long mun.

Olgeta taim mi save lukim ol yangpela manmeri na planti bikman na meri tu i save raun long ol opis long askim wok bikos ol i laik wok. Planti i save laki bikos ol i gat gupela pepa o referens na planti i no save laki bikos nogat spes long wok o wok i pulap. Sampela i save wok maski wok i pulap bikos wantok bilong ol i bos bilong dispela kampani olsem na em i kism ol long wok.

Painim wok em i no isi samting bikos bihain long yumi olgeta i save pinisim skul long koles, yuni-vesiti na arapela trening skul, yumi laik kism wok long wanem samting yumi kism trening na save long en. Taim yumi pinisim skul long wok mekenik, yumi mas kism pepa o setifiket bilong mekenik i go long ol kampani husat i save wokim ka bikos wok bilong yumi i

stap long dispela kampani. Sapos kampani ya i gat spes, em yumi laki na sapos i nogat em nogat nau. Wankain tu long ol arapela wok.

Taim yumi pinisim skul o trening, bikpela tingting bilong yumi i save sut long painim wok mani bikos papamama i tok yumi mas pinisim skul na painim wokmani. Olsem na dispela toktok bilong ol i save kism yumi raun long olgeta opis long painim wok. Taim yumi painim wok nau, yumi yet i save amamas na famili bilong yumi tu i save amamas bikos ol i save olsem hatwok bilong ol i kamap tru.

Insait long kantri olsem Papua Niugini, sans bilong kism wok i no isi bikos i nogat planti bikpela bisnis i kamap yet.

Long arapela bikpela ovasis kantri, ol manmeri i gat wok long opis, planti i nogat tasol ol i save pilai spot na kism potnait pe, sampela i mekim ol komyuniti wok na kism potnait na arapela liklik wok na kism potnait long en. Tasol long PNG em i hat bikos yumi i no kamap long dispela kain mak yet.

Sampela bikpela kampani i laik kamap tasol ol i save surik liklik long lo bilong Gavman bilong yumi. Nogut ol i kam wokim bisnis na lo bilong Gavman i hat tumas na ol i no inap mekim gut profit. Sapos hevi bilong lo na oda i bikpela tumas long kantri tu, dis-



• Kopi Industri Kopresen (CIC) i save helpim ol bus lain long baim hap balus fea long balus i karim kopi i go long Goroka taun. Ol i kelim Freit Subsidi Skim. Foto: Yames Kay.

pela i save pretim ol kampani long kam insait long kantri. Sapos strong bilong mani bilong kantri i anitit long mani bilong ol arapela kantri, ol bisnis i save pret tu bikos ol i ken lusim bikpela mani bilong ol taim ol i baim ol saplai na kago long ovasis bikos bai ol i tromoi bikpela mani moa na mani bilong ol bai sot long ronim bisnis. Ol bisnis i save pret tu bikos nogut Gavman i kism bikpela takis tumas long ol na ol inap lusim planti mani bilong ronim wok. Dispela em sampela tingting we i save daunim ol bikpela invesmen kampani long kam insait long kantri na mekim bisnis we inap kamapim wok long planti yangpela manmeri i ken wok.

Long dispela yia, Gavman i kamapim wanpela lo bilong kism 15 pesen (%) takis long olgeta interes i save kamap long pasbuk bilong ol manmeri long olgeta benk. Tasol Gavman i tok wanem pasbuk i save pulim olsem K3.000 bai ol i kism 15 pesen takis long dispela kain interes. Dispela i sut long ol bikpela kampani na bisnis husat i gat pasbuk insait long ol benk. Dispela gen i pretim olgeta kampani na bisnis bikos ol i save baim takis long Gavman long planti samting. Na na Gavman i laik kism takis long mani bilong ol insait long benk na dispela i bagarapim tru tingting na bel bilong ol kampani na bisnis. Olsem na wanpela rot tasol long ol i mas sanap strong long wok bilong ol na i no ken pundaun o pasim wok em long noken kism moa wokman na tu sapos em i gat planti wokmanmeri nau, em i mas rausim sampela. Bikos mani bilong ol long lukautim ol wokmanmeri na wok bai i pundaun long wanem Gavman i wok long pulim sampela mani bilong ol gen long benk.

Nau Gavman i rausim planti pablik sevans mak olsem 7000 olgeta long wok. Planti bilong ol i

papamama wantaim ol pikinini husat i stap long skul na sampela i liklik yet na i stap wantaim ol. Taim papamama i nogat wok, bai ol pikinini tu i no inap kism gupela skul na planti bilong ol bai i nogat sans long wok. Taim Gavman i tok long rausim 7000 pablik sevans wokmanmeri, em i no tok long kism nupela 7000 wokmanmeri long wok. Dispela i soim olsem Gavman i no inap kism ol wokmanmeri long wok na namba bilong ol manmeri husat i laik wok bai planti yet na i bung i go bikpela moa long bihain.

Wanpela bikpela piksa bai yumi lukim em long planti manmeri long bihain bai raun nating long rot na i nogat wok bilong ol long mekim. Na long dispela taim bai ol bikhet pasin na kain kain trabel i kamap. Na dispela bai pretim ol kampani na bisnis long mekim wok na ol bai kirap lusim kantri na ronawe na moa manmeri bai i nogat wok.

Gavman i save tok strong olsem kantri bilong yumi i pulap long planti samting long graun olsem na yumi mas go bek long ples na mekim wok antap long graun bilong yumi na bai kaikai i kamap na yumi ken kism mani long en.

Dispela toktok em i tru na i no giaman bikos yumi olgeta i gat graun bilong mekim wok long en long painim mani. Sapos yumi planim kaikai na salim long maket, bai i gat mani i kamap. Sapos yumi laik wokim plentesen kopi, kakao, oil pam, kopra, kadamon na arapela kes krop olsem, yumi mas brukim bikpela hap graun na baim planti sids bilong ol dispela samting. Dispela i min olsem yumi mas kism sampela dinawu mani long benk long baim ol marasin bilong givim gris long graun, trakta bilong brukim graun, ol sawol, naip na ol arapela samting bilong mekim wok wantaim. Olsem na sapos Gavman i ken opim rot bilong benk long mekim isi long kism mani


olsem bilong mekim wok, ating em bai orait. Tasol sapos Gavman i laik kism bikpela mani bilong ol pipel tasol, ating dispela rot na tingting bilong Gavman bai i no inap wok gut.

Planti ples tu maski ol i kamapim ol plentesen na kamapim kaikai na samting bilong ol, tasol rot bilong ka o sip i longwe tumas long ol i salim kago bilong ol. Na dispela i save daunim interes na laik bilong ol manmeri long kamapim samting.

Husat manmeri i laik kamapim sampela samting bilong ol i ken salim, i mas i gat maket bilong em long PNG yet bai isi long ol pipel i ken salim wanem samting ol i wokim o kamapim. Sapos maket bilong ol dispela samting i stap long narapela kantri, orait Gavman i mas kam insait long helpim na karim ol dispela samting bilong ol manmeri i go long dispela ovasis maket bilong salim.

I gat kainkain rot bilong kamapim wok bilong yu yet o wok long narapela man long painim mani o kism potnait pe.

Olsem na sapos Gavman i sanap strong long ol manmeri i mas kamapim wok bilong ol yet, orait Gavman i mas opim rot bilong dispela tingting o plen em i laik kirapim bai plen bilong em i ken wok gut long plentesen yet i go antap long maket na ol manmeri i ken painim liklik mani long wok bilong ol. Sapos Gavman i laik bagarapim ol gupela wok bilong ol kampani o bisnis, o rausim moa pablik sevans long wok, orait em i mas sanapim narapela plen bilong ol dispela manmeri husat i nogat wok bai mekim long bihain. Olsem bai i ken i gat balens olsem sampela manmeri i ken wok long opis o wantaim ol kampani na sampela i ken wok long graun o plentesen na tupela wantaim i gupela bikos tupela wantaim i ken kamapim mani na kism potnait pe.



• Minista bilong Komes Michael Nali i lukluk long wanpela kampani ol meri i save wok long samapim ol samting long Lae siti.

# Hevi bilong rot i save bagarapim ol pipel na bisnis

Ol pmv operesen bilong mi insait long Vanimo taun na las kos na Wes kos rot long las yia i bin bungim bikpela hevi long mani bikos long kos bilong baim woksop na tu baim ol nupela spea pats bilong tupla pmv bilong mi. Dispela kos i olsem K25,000 olgeta long wanpela yia.

Dispela em komplem na bel kros bilong wanpela praivet bisnisman long Sandaun provins husat i wok hat long laik kirapim wok na bisnis bilong em. Tasol ol hevi we i stap long han bilong gavman i wok long daunim na tram bagarapim bisnis bilong turangu dispela bisnisman na tu planti arapela lain husat i save ronim ka na pmv bisnis insait

long provins.

Bagarap bilong rot long ol taun i go long ol bikpela haiwe rot i save mekim belpen tru long planti papa bilong ol pmv ka na ol praivet ka tu wantaim. Bikos taim ol ka i bagarap long ol dispela rot nogut, ol turangu i save pilim pen tru long baim ol spea pat, nupela taia na stretim ol arapela bagarap bilong ka. Dispela kos em ol yet i save baim long mani bilong ol yet. Sampela taim bisnis i save pundaun bikos mani i pinis long ol dispela kos.

Bikman ya i tok em i bin lukim long henbuk bilong rifom na toktok i stap olsem wok bilong stretim rot, bris na ol bikpela wok olsem em i

stap namba wan long lista bilong gavman long karimaut olgeta taim.

Em i tok sapos i nogat rot, bai ol sevis olsem helt, skul, wara saplai na ol arapela gavman sevis na wok i no inap kamap. Na plen bilong gavman long givim sevis long ol pipel bai ino inap kamap tru.

Dispela lukluk na lukautim em namba wan wok bilong ol memba bilong mipela. Ol memba ol i mas tingim dispela na sanap insait long wari bilong yumi.

Rot tu i save kirapim planti gutpela helpim na wok i kamap. Ol manmeri long ples i gat kopi, kakao, kopra, ol kumu na kaikai bilong salim long maket. Na ol i

save yusim rot na karim ol dispela samting i go salim long taun we ol i ken gat liklik mani long poket bilong ol long baim suga, sol, sop, trausis na siot, laplap na ol samting ol i save sot long en. Ol pipel i save gat mani na ol i sevim long baim skul fi bilong ol pikinini bilong ol long olgeta yia.

Olsem na yumi ken lukim olsem rot i bikpela samting na i kamapim planti gutpela na bikpela samting long laip na sindaun bilong ol pipel.

Ol pipel long ples i save amamas na taim rot i blok bikos long bikpela ren na wara i tait brukim rot, ol pipel i painim hat na ol i stap bek long ples bikos nogat ka bai

ron. Ol papa bilong pmv na ol ka tu bai i stapim ka bilong ol i stap long ples bikos rot i bagarap. Na dispela ol i bagarapim bisnis bikos ol i lusim mani long wok bilong ol na ka i no mekim wanpela mani.

Gavman i bin mekim bikpela plen long wokim planti bikpela rot we inap bungim tupela o tripela provins wantaim. Olsem na sapos dispela em namba wan na bikpela wok bilong gavman long mekim, em i mas soim dispela tingting na sanap bilong em long stretim gut olgeta rot we i stap pinis long kantri. Bai ol pipel i ken save olsem gavman i save mekim wok bilong em long lukautim na stretim gut ol rot bilong kantri.

## Palamen i olsem gris ples

### MASTA WAI i raitim

TAIM bikpela haus palamen i bin op long olgeta 109 nesanel memba bilong palamen i kam bung, ausait long palamen haus tu i pulap tru long ol manmeri bilong planti kain kain ples. Olgeta i kam tu long lukim memba bilong ol na toktok wantaim ol. Dua na bikpela geit bilong haus palamen i pulap tru long ol planti manmeri bilong ples na long taun tu.

Mi bin bungim sampela lain bilong ples i kam long lukim Gavana bilong ol. Ol i kam wantaim sampela bikpela hevi long sindaun bilong ol long ples. Olsem na ol i sanapim tingting olsem Gavana bilong ol inap painim sampela gutpela rot long helpim ol wantaim hevi na wari bilong ol.

Dispela i soim tu olsem, ating

long provins bilong ol yet, i save hat tumas long ol ples lain i gat sans long lukim lida bilong ol. Ating long provins yet, opis bilong gavana i save hat tumas long ol asples lain i go mekim apoinmen bikos ating planti lain tumas i save laik lukim Gavana o ol kain lida bilong provins. Olsem na planti apoinmen bilong planti lain i save stap longpela taim moa.

Tasol taim ol asples lain i lusim mani long kisim balus i go long Mosbi long lukim memba o Gavana, ol i save gat gutpela sans tu long lukim lida o nogat?. Sapos memba i Minista, ating bai em i nogat inap taim long lukim ol pipel bilong em long ilektoret. Bikos em bai i gat planti wok na ol bung bilong dipatmen na ministri em i lukautim. Bai em i mas sindaun long planti bung bilong wokim ol plen na polisi na ol ripot bilong kisim i go long palamen o long



• Spika Bernard Narokobi (lephan) wantaim Praim Minista Sir Mekere Morauta (namel) na Oposisen lida Bill Skate i sanap long fran bilong haus palamen.

kabinet miting. Ating wanpela gutpela taim tasol long memba o minista i ken mekim long lukim ol pipel bilong en, em long wiken long haus bilong em stret. Bikos long opis, bai em i nogat taim.

Ating sapos memba i memba nating na i no kisim wanpela wok ministri, em bai i gat sampela taim long lukim ol pipel bilong em. Ating bai em i gat planti taim na em bai singautim ol pipel bilong em i go long opis bilong em long ol i ken sindaun na toktok wantaim. Na ol pipel i ken autim tru planti wari na hevi bilong ol we memba inap painim rot bilong helpim ol.

Sapos ol pipel bilong ples i go lukim memba long haus palamen, na long dispela taim, em bikpela bung bilong palamen i kamap, bai husat memba, minista o Gavana i mas painim spes o taim insait long dispela taim long lukim ol pipel bilong em. Sampela taim, ol lida i no laikim bai ol pipel bilong em i lukim em long dispela taim bilong palamen kibung. Olsem na sampela i save askim ol pipel long kam bek lukim em long wanpela o tupela wik bihain.

Long las yia mi bin lukim planti lain bilong ples i bin go lukim memba bilong ol. Tasol dispela i bin kamap long taim bilong palamen kibung stret long dispela wik. Mi bin bungim narapela tupela bikman long ausait dua bilong haus palamen. Na mi askim tupela. Tupela i tok, sampela lain i go insait pinis long lukim memba na

tupela i stap ausait bikos nogat man inap sainim tupela i go insait.

Tasol memba bilong ol ples lain ya em mi bin lukim em i sindaun long floa bilong haus palamen long taim bilong bung. Bihain tasol long bung i pinis, memba ya i bungim mi long rot insait long palamen na tok halo long mi na em i tekov i go long painim kaikai long belo. Taim mi kisim stori long tupela ples man olsem ol i kam long lukim memba, mi tingim tasol sapos memba bai i gat taim long sindaun na toktok wantaim ol long apinun o nogat. Bikos dispela em bisi de tru bilong olgeta memba bilong haus palamen.

Tasol ol pipel tu em bikpela samting long olgeta memba i mas rispek na givim sampela taim long lukim ol na harim wari bilong ol.

Planti ples lain i save ting gutpela taim bilong lukim memba em long taim palamen i bung. Bikos long dispela taim, bai memba i kamap na stap na ol i ken lukim em isi long opis bilong em. Tasol ol i mas kli tu olsem, sampela taim, memba bai i gat planti wok o bung long dispela taim bikos long sampela bikpela toktok we i sut long wokim lo o ol bikpela toktok bilong palamen i mas pasim. Olsem na i gat hap hap sans bilong ol pipel na memba long ol i ken bung wantaim.

Taim mipela i makim lida i go long haus palamen, em i no moa lida bilong yumi dispela famili o dispela ilektoret tasol. Em i stap

pinis long bikpela haus bilong nesanel palamen. Na em bai sanap olsem lida bilong olgeta pipel bilong Papua Niugini. Em bai mekim ol lo na disisen we olgeta manmeri bilong Papua Niugini bai kisim amamas o sevis na developmen long en.


Planti lain i go stap long Mosbi na i laik go bek. Na taim ol i bungim hevi long baim tiket bilong balus, ol i save ron i go long haus palamen long lukim memba long givim ol mani bilong baim balus tiket. Arapela i save ting olsem ol i mas go lukim memba long givim ol sampela mani bilong statim ol liklik wok projek insait long ples o long taun. Dispela em planti kempen komiti bilong ol memba i save kamap wantaim.

Tasol dispela samting i gat hevi bilong em. Taim memba i kisim ol toktok long komiti o ol lain famili o lain sapota bilong em long mani bilong wokim bisnis, sampela taim memba i save pundaun long dispela kain traime we em i save givim aut mani. Na bihain, ol lain bilong Odita Jenerel i save sekim rekot bilong mani ol memba i save kisim na askim long risit na pepa bilong ol wok mani i go long en. Na dispela i save kotim memba na memba i save lusim sit bilong em na go kalabus o risain long kamap memba.

Long palamen taim, planti manmeri i save go pulap. Na ol i gat planti kain kain stori na as bilong lukim memba long tokim em



• Gavana Jenerel Sir Silas Atopare i putim lek long step bilong haus palamen.



# Tupela Kulaka susa sotwin long wetim tupela kumul

taim tupela man ya i kam bek long narapela de bai tupela save olsem ol gel ya i bin wetim ol long aste. Dispela peint mak em bilong toksave tasol.

Nau yet tupela yelo na repela

peint i stap yet aninit long ston ya. Sapos yu go antap stret long Kugar Ku bai yu lukim dispela ol peint i stap long wanpela ston. Dispela ston wantaim peint i popula stret long Kalaka

wanpisin insait long Banz distrik bilong Westen Hailans.

**Matt Dedeboh Oleya Banz**

BIPO taim, tupela yangpela meri bilong Kulaka wanpisin insait long Not Waghi, Westen Hailans i bin stap. Nem bilong ol em Kine na Gele.

Ples bilong tupela em Jipengku. Lain bilong tupela em ol i kolim ol yet Tungeamp na ol i bilong Kulaka wanpisin.

Tupela susa ya i save stap long ples na planti yangpela man long narapela ples olsem Minz, Banz, Nongdul na Tei kaunsol i save kam bilong pren-im ol o laik maritim tupela susa ya tasol tupela save les long ol. Tupela meri save karim tais na bro ya. Bipo ol manmeri i bin gro bikipela tru olsem ol giant o masalai. Planti man i wok long askim laik na traim ol tasol tupela i save les.

Kine na Gele bin pundaun pinis long tupela kumul bilong hapsait maunten nau yet ol kolim Jimi. Tupela man ya i bilong Mungulka klen bilong lowa Jimi. Nem bilong tupela em Mulung na Koinga.

Planti taim tupela susa ya save go antap long maunten ol kolim Kugar na tupela man i save bihainim rot long hapsait na kam antap long Kugar. Na ol save karim-lek na singsing long antap bilong maunten stret (summit). Dispela samting i save kamap planti taim i go pinis na wanpela taim ol yangpela ya i makim taim long bung wantaim tasol tupela kumul ya i no kamap long maunten.

Tupela susa i wet long morning i go apinun na ol yangpela boi Jimi i no kamap. Tupela plaua bilong Jipangku i bin kisim sampela peint na putim yelo na repela peint aninit long wanpela ston. Dispela ston em i gat wanpela kain kep (bend) so



**Nem:** Elsie Clyde  
**Krismas:** 22 (meri)  
**Adres:** P O Box 1950, Lae, 144. Morobe Province  
**Save Laikim:** Pilai sport, danis, kuk na lukim TV.

**Nem:** Palus Nebare  
**Krismas:** 18 (man)  
**Adres:** Numundo Plantation, P O Box 26, Kimbe, WBNP  
**Save laikim:** Go lotu, lukim TV, ridim baibel, waswas long solwara, pilai spots na raitim pas long pen pren.

**Nem:** Moses Mote Maken  
**Krismas:** 27 (man)  
**Adres:** Kumul SDA Church, P O Box 1533, Mt Hagen, WHP  
**Save laikim:** Pilai ragbi, raitim pas na raun wantaim ol mangi.

**Nem:** Greg Bovoi  
**Krismas:** 25 (man)  
**Adres:** Aitape Voc/ Traning Institute, P O Box 34, Aitape, Sandaun Province  
**Save laikim:** Spot, go lotu, senisim presens, camp aut, lukim TV, ridim buk, tok pilai na marit.

**Nem:** Jacob Joe  
**Krismas:** 33 (man)  
**Adres:** Kimbe Town Authority, P O Box 127, Kimbe, WBNP  
**Save laikim:** Senisim presen, go lotu, serim tok bilong God na painim wanpela kristen meri bilong maritim.

**Nem:** Philip Gee Naur (GPN)  
**Krismas:** 17 (man)  
**Adres:** Numundo Plantation, P O Box 26, Kimbe, WBNP  
**Save laikim:** Pilai spots, go lotu na waswas long nambis.

**Nem:** Lucy Limu  
**Krismas:** 14 (meri)  
**Adres:** Ponow Primary top-up, P O Box 401, Mendi, SHP  
**Save laikim:** Go lotu, pilai spots, ridim buk, senisim presen na mekim pen pren.

**Nem:** Leonard Niawa  
**Krismas:** 33 (man)  
**Adres:** C/-Sebbie Hulua, P O Box 253, Madang  
**Save laikim:** Wanpela meri i mas strong Katolik kristen long rait long mekim pren na bihain marit.

**Nem:** Dorish Benson  
**Krismas:** 17 (meri)  
**Adres:** Kimbe Provincial High School, P O Box 225, Kimbe, WBNP  
**Save laikim:** Raitim pas long ol pren, waswas long wara, ridim buk, go skul, save laikim tru long mekim penpren wantaim olgeta lain.

**Nem:** David Philip  
**Krismas:** 18 (man)  
**Adres:** P O Box 137, VFCTC, Kokopo, ENBP  
**Save laikim:** Pilai spot, harim rok musik, harim tok bilong papamama, go wok gaden na rait long penpren.

**Nem:** Sandra Baba Owusu  
**Krismas:** 25 yias (meri)  
**Adres:** P O Box AD 398, Adisadel Royal palace, Avenue, Cape Coast, Ghana, WA  
**Save Laikim:**Raun lukim ol arapela ples, rit, kisim poto, pasin tumbuna na senisim ol tingting culture.

**Nem:** Lucy Nana Kissi  
**Krismas:** 27 yias (meri)  
**Adres:** P O Box CC 1512, Cape Coast, Ghana, WA  
**Save Laikim:** Kalsa, Serim ol tingting, raun lukim ol narapela ples na senisim ol



## Dia Laipplain

Tupela krismas i go pinis mi bin maritim wanpela meri long ples bilong mi. Tasol mi bin stap yet long skul.

Mi bin lusim em i stap wantaim ol papamama bilong mi na em i save helpim ol long ol haus wok na gaden. Em bin lukautim tu ol brata susa na bubu bilong mi.

Taim mi kisim wok long siti, mi bin salim balus tiket long meri i kam na stap wantaim mi tasol bihain mi painaut olsem ol papamama i kros long meri na em bin lusim ol na go bek long papamama bilong em bipo em i kisim balus tiket.

Stori i olsem ol papamama bilong mi i bin lusim ples na

## Mi wari long meri na papamama bilong mi

meri bilong mi tasol i stap lukautim lapun bubu bilong mi.

Meri i no bin laik stap em yet na em i lusim ples bilong mi na go bek long papamama yet bilong em. Ol arapela pipel long ples i no wanbel tumas long papamama bilong mi i lusim ples na longpela taim na larim meri tasol i stap lukautim haus.

Nau papamama bilong mi i wok long komplem planti olsem mi no save salim bikipela mani i go long ol. Na ol i kros long meri bilong mi long dispela. Mi traim long mekim klia long ol olsem sindaun long siti i hat na mipela i nogat ekstra mani long salim i go long ol.

Mitupela wantaim i laik helpim ol papamama bilong mipela tasol long nau em i stap long han bilong mi na meri bilong mi long yusim mani long rot we mipela i laikim.

### UNHAPPY SON

#### Dia Pren

Mipela i ting olsem pasin na tingting bilong yu na meri we i sut long dispela samting i gutpela.

Watpo na papamama bilong

yu i komplem olsem? Yu traim long painimaut watpo tru ol i mekim olsem? Ol i laikim tumas helpim long meri bilong yu na nau em i no stap ol i painim em? Olsem wanem, ol i ting olsem yu wok long givim moa helpim long ol lain long meri bilong yu?

Sapos ol i painim hat long sindaun bilong ol nau meri bilong yu i no moa stap wantaim ol, yu mas luksave olsem em bin helpim ol gut tru. Tingting bilong yu olsem wanem, yu ting ol i les tasol o ol i lapun na i hat long ol i lukautim ol yet.

Bai yu wokim wanem samting long helpim ol? Yu gat ol arapela bikipela brata na susa husat i ken helpim yu? Inap yupela i stretim ol samting na helpim ol long wok gaden, salim mani i go long ol? I gat ol arapela hauslain we i ken helpim ol? Yu tokim ol tu olsem yu bai helpim ol sapos yu stretim hevi long sait bilong mani.

Sapos olsem yu tok ol ples lain i pilim olsem papamama bilong yu i no bin wokim gutpela pasin pastaim inap yu salim wanpela ankel bilong yu long

toktok long ol na mekim klia long ol olsem laip long siti ii narakain long dispela long ples? Na em i hat long sevim mani? Ating em i moabeta long pasto o pater i toktok long ol.

I moabeta tu long yu toktok wantaim wanpela hauslain bilong yu long siti husat i ken toktok long papamama na mekim klia long ol olsem yu no lus tingting long ol tasol bai yu helpim ol yet taim yu stretim hevi bilong yu long sait bilong mani.

### Laipplain

Sapos yu gat hevi, rait i kam long LIFELINE, POBox 6047, Boroko o ringim mipela long telipon namba 3260011. Ratim tru nem na adres bilong yu bikos mipela i no inap long salim bekim long askim bilong yu inap yu givim nem tru. Yumi bai toktok long ol hevi we yu bungim na rait i kam long mipela long en tasol bai mipela i no inap long putim nem tru bilong yu long long dispela kolom.

### Laipplain



• Sans Kaikai ya. Mama ya i redim kaikai pinis long paia na husat i laik stret bel i ken tromoi 20t na kisim wanpela hap kaukau na sipsip.



• John Kaima na ankol bilong em Witney Justine i amamas na selebretim Jubili 2000 long Parua Katolik misin long hapsait bilong Yongomugl, Simbu provins wantaim ol balun. Moa long 10,000 pipel i bin kamap long dispela selebren long wik i go pinis. *Poto: Sape Metta.*



• Olpela Tred Misin lida bilong Taiwan Dokta Henry Hsu i amamas long givim presen long ol skul studen bilong PNG las ya.



• Wanpela viles lida long Hobe hauslain i sikan long memba bilong Goroka Henry Smith bihain long em (mema) i givim ol wokabaut somil masin long wik i go pinis. Em i givim tu K10,000 kes mani. *Poto: Sape Metta.*



• Memba bilong Huon Galp Tukape Masani i go pas long ol visita olsem memba bilong Nawae Kennedy Wenge. Em i pulim ol i go long Salamaua stesin.

Minista bilong Fisheries Ron Ganarof i bin pasim tok wantaim siaman bilong Taiwan Deep Sea Tuna Boat owners na Export Asosien, James T. P. Tsai na Trade representativ bilong Taiwan long PNG Dokta Henry Hsu olsem Taiwan i ken kam painim pis long PNG. *Poto: Wenceslaus Magun.*







# KANAGE

"Em nau, narapela wik bilong mi ken"



## • I kam long pes 25

Kanage em i wampela kaunsila bilong ples bilong em. Wampela Sarere apinun em i signautim ol manmeri long kam bung long ples bilong miting na stretim sampela hevi bilong ples. Bihain long olgeta toktok i pinis ol i go nambaut long wanwan haus bilong ol. Kanage wantaim ol tambu bilong em ol i go bung long win haus bilong em. Na ol i wok long mekim fani na lap i stap long win haus. I no long taim wampela yangpela meri i kam na sindaun wantaim ol. Taim em i kam sindaun em i no stretim gut sait lek trausis bilong em i op nating i stap. Lek trausis bilong em i op nating i stap na yangpela meri ya, em i bisi tru long stori na em i no save olsem lek trausis bilong em i op nating. Kanage ting em tasol lukluk ong mun lait. Kanage tok bipo mi save ting olsem mipela ol man tasol i save long sevim ol mausgras. Tasol nogat ya, yupela ol meri tu save pinis long sevim mausgras.

Singee Bons  
Ambunti

pikinini. Ol manmeri i tok olgeta i stap na lukim ka i bamim manki na tasol taim Kanage i harim, em i toktok na daunim olgeta na tok, mi wampela mi lukim stret. Em i no tingting long kot. Bihain em kirap na go long haus. Taim em i go, ol man i tok sapos plis i kam, bai Kanage i mas givim ripot. Tasol Kanage i no save long tok pisin na i no long taim na plis i kamap. Plis i askim long husat tru i lukim birua? Na olgeta i kolim nem bilong Kanage. Kisim em i kam plis i tok. Wampela meri i go na tokim em olsem bai Givim ripot long plis. Bel bilong em i pas olgeta, na em i tok, go pas bai mi kam bihain. Meri i go na tokim plis long tok bilong Kanage. Tasol em i no kam na meri i go ken na Kanage i givim wankain tok ken long em. Ol i wet i go long taim tru na meri ya i go ken. Tasol Kanage i givim sem toktok ken. Na taim meri i go bek long ol plis gen. Kanage i lusim haus ron i go daun long banis pik bilong em, opim dua long banis na ronim pik i go aut long banis, na stat long ronim

long ausait. Na taim pik i laik ron i go insait em i save rausim bai i noken go insait. Tasol ol man i belhat na singaut strong long em bai givim ripot long plis. Na em kirap na tok wetim mi ronim pik i go bek long banis pas taim. Ol man i harim na dai stret long lap. Bikos ol i save olsem Kanage i giaman bikos i no save long tok pisin.

Eremas Matamatam  
Rabaul

Kanage em bilong ples Kasinik long Biangai na em i save wok long wampela kampani long Wau. Taim Kanage stat wok em bin lusim ples Kasinik na em bin go i stap long Wau taun na slip wantaim wampela man Garaina. Kanage save i stap wantaim man Garaina na em i save go kam long wok. Wampela taim bos bilong kampani singautim Kanage i go insait long opis bilong em na tokim Kanage olsem. Kanage nau bai yu bosim wampela seksen na tu bai mi lusim wampela ka wantaim yu bikos yu bikman tumas long wok about i go kam long wok. Kanage amamas nogut tru na em tekov i go long haus. Long neks moning Kanage i no tingting long brekfas, em tekov stret i go long wok. Taim Kanage wok i stap bos bilong kampani singautim em i go insait long opis na tokim Kanage long wanem seksen em bai bosim. Okay bos tokim Kanage long bosim wok-sop na givim wampela len krusa long Kanage. Na long apinun Kanage hangre nogut tru na em

statim ka givim siksti i go kamap long haus na askim man Garaina long kaikai. Na man Garaina bekim long tokples na tok kaikai "gone" "bam" long tokples Garaina dispela tupela hap tok em min olsem nogat kaikai, tasol Kanage ting olsem man Garaina tokim em long go na bam, so Kanage statim ka na givim siksti i go na bam na idai.

James Munefa  
Wau

Paps Kanage em bilong KTY long Is Elimbari insait long Chuave. Paps Kanage i kisim bek wokabout isi isi i go daun na em laik hakim pis long wara magawari em bisi tru long hakim pis i stap. Man paps Kanage ya em mekim save tru long hakim pis. Oloman hap ai i lukluk i go antap em i lukim yangpela meri em naispela meri tru. Lapun paps Kanage wantu em kisim huk wantaim pis. Kanage i kam i go na em bamim wampela yangpela meri kisim em i lap nogut tru klostu yangpela meri kain em i dai long lap na paps Kanage i toromoi hap pisin i go long yangpela meri Kiori. Meri yu i kam na mi pundaun tru long yu. Yangpela meri kirap em tok olsem yu i stap isi. Oloman em ya i toromoi tok ples i go long paps Kanage olsem em tokples.

Sam Kol  
Simbu

Wampela taim Kanage laik sekim bon de bilong pikinini bilong em. Nau em singaut long

pikinini bilong em. Hoi Hoi na em i no harim. Na em i singaut gen. Hoi Hoi ai ai. Em nau pikinini i harim na bekim. Yes Dodik. Paps Kanage i harim na i no wanbel long kolim em Dodik. Yupela pikinini mi no Dodik nau tasol mi waswas na wasim ya. Pikinini laik tok deti na abris em tok Dodik. Nau Kanage i askim long bon de bilong pikinini. Ai pikinini yu tok long wanem mun yia mi karim yu na yu kamap. Em laik tok long wanem 'mun yia yu long kamap?

Francis Maje  
Wewak


Kanage bilong Lumi, wampela taim em i go raun long Vanimo taun, na lukim pikinini bilong em wok long Vanimo Fores Kampani. Em raun i go na ples i hat tumas na em i laik waswas stret. Em kisim taim na i go insait long waswas ples. Kanage rausim trausis bilong em na hangamapim long palang bilong haus na em waswas. Em waswas pinis, na kisim tauwel na rausim wara. Kanage rausim wara pinis em putim tauwel long nek bilong em na i kam ausait. Em ting olsem ol i lap long husat. Oloman i no long taim sampela man i lukim em na kirap singaut na tok olsem. Oloboi geit kipa yu i no pasin dua na plis wantaim 2-pela dok i kam insait long maket. Kanage harim na tok "tude mi kam long opim maket. Yupela ken kisim olgeta samting fri.

Solman Ruben  
Aitape









# BUSINESS

ISSUE NO. 31

K1.00


## 1st Parliament Spring 2000

**Mining &  
Petroleum  
projects set to  
start...**

■ Napa Napa oil refinery

■ Approves Ramu  
Development Plan

# APRIL ISSUE KAMAUT NAU!!



PAPUA NEW GUINEA

## BANKING CORPORATION

PEOPLE > BUSINESS  
GROWTH > PROFITS

RIGHT ACROSS PAPUA NEW GUINEA, WE BRING BUSINESS TO YOU

# Tupela moa pilaia i go long Nu Silan

TUPELA biknem PNG Pukpuk pilaia Paul Joseph na Aiemi Pilokos bai lusim kantri tude long joinim wnapela klab long Bay of Plenty long Nu Silan long pilai profesenel ragbi yunion.

Dispela tupela pilaia i bin go pas long PNG Pukpuk long Intanesenel Ragbi Wol Sevens long Nu Silan, Fiji na Australia.

Joseph i stap long Pot Mosbi na i save pilai wantaim Yunivesiti klab. Pilokos i stap long Lae na i save pilai wantaim Difens klab.

Paul Joseph i bin stap wantaim las sisten na pilai fly-half senta. Em i go pas long helpim dispela tim i winim fainels tu ya. Orait long soim strong bilong em, Joseph yet i skorim olgeta poin 19-0 long semi fainels.

Oi i bin askim long pilai long Nesenel Provinsel Sempionsip tasol em i lusim na kambek long Pot Mosbi long strongim klab bilong em.

Na long nesanel sempionsip bilong Ragbi Sevens, em i helpim Daru long winim sempionsip namba wan taim stret long histori bilong PNGRFL na tu Daru Ragbi Yunion.

Pilokos i bin winim wing posisen taim em i joinim PNG Pukpuks namba wantaim long 1993 taim oi i go pilai long Arafura Gems. Nau yet em i holim dispela posisen na i bin raun long planti kantri olsem Hong Kong, Guam, Cook Ailan, Guam na Singapore

Man i go pasl ong stretim wok-abaut bilong tupela i go long Nu Silan, Tony Armstrong i tok olsem dispela tupela pilai i gat sans long stap longpela taim tru wantaim ol klab long Nu Silan.

Em i tok dispela tupela pilaia i save kamapim gutpela pilai stret wankain olsem ol arapela pilaia long Nu Silan.

Kosa bilong Nu Silan Sevens tim Gordon Teitjins em kosa

bilong Bay of Plenty, na tupela pilaia ya bai gat sans long lukim tupela yet i surik i go long nesanel level long ples bilong Kiwi.

"Mipela i putim tingting tasol long ol i ken pilai 15 futbol na kisim sampela save i kambek long strongim lokel klab na tu nesanel tim bilong PNG, Pukpuks," Armstrong i tok.

Dispela tupela pilai i gat nem long PNG. Arapela tupela pilaia i stap pinis long Nu Silan em James Pomat na Paul Pomoso. Dispela i stap wantaim College Old Boys Ragbi and Sports club (Cobras) long Te Aroha.

Farel Temata husat i bin kam wokim kosing wantaim PNG Pukpuks i tok olsem tupela i pilai gut tru las wiken. Pomat husat i kamapim gutpela pilai i winim awot bilong "Player of the Match" las wiken.

## Barclay givim K84,000 long spots

BIKPELA kampani bilong wokim rot na bris insait long kantri, Barclay Brothers i givim K84,000 i go long PNG Sports Federesen long salim tim i go pilai long 2000 Olimpik Gems long Sidni, Australia.

Mausmeri bilong Barclay Brothers Megan Taureka i tok olsem kampani bilong em i mekim bikpela wok tru long kantri na dispela mani em bilong helpim ol spotsman na meri.

"Mipela i amamas tru long poroman wantaim PNG Nesenel Olimpik Komiti long redim ol spotsman na meri long kamap makim kantri long ol intanesenel gems," Mis Taureka i tokaut olsem long konprens bilong ol niusman.

Presiden bilong PNG Spots Federesen Sir Henry ToRobert i tok olsem em i amamas tru long Barclay


Brothes long gutpela wok ol i mekim. Em i namba tu taim oi i givim wankain mak bilong mani i go long helpim wok bilong PNG Spots Federesen long redim ol spotsman na meri long intanesenel gem.

Sir Henry tok olsem PNGSF bai yusim dispela mani long salim ol spotsman i go long ol kompetisen we i ken redim ol yet long go pilai insait long Olimpik Gems long Sidni long Septemba.

"Mi laik mekim bikpela tok tenkyu i go long menesing dairekta Brian de Luca na kampani long gutpela sapot bilong ol." Sir Henry i tok.

Presiden bilong PNGSF i tok olsem Olimpik Tos Rilei i kisim planti gutpela nius bikos Mis Megan Taureka i mekim planti wok stret ya.

## 4-pela meri kisim pinisim referi kos



• Sampela ol referi i kisim moa save lon g piksa buk.

### GABRIEL PISE i raitim

FOAPELA meri i pinis besik soka referi kos na i ken mekim wok bilong soka referi insait long kantri.

Oi dispela foapela meri ya i pinisim skul wantaim arapela 28 soka referi insait long Telefomin, Saundaun provins.

Siaman bilong Yut Developmen wantaim PNG Futbol Asosiesen Gabriel Pise i ranim dispela kosa ya.

Dispela em i namba wan taim wanpela longwe ples insait long Sandaun provins i kisim dispela kain kos o helpim i kam long soka opisel.

Soka em wanpela bikpela spot we oi i save pilai insait long Sandaun provins. Olsem long helpim dispela spot i kamap bikpela, oi opisel i mas gat ol dispela kain hap pepa olsem soka referi o kosa long mekim wok.

Telefomin Soka Asosiesen na Telefomin Distrik Administresen i go pas long holim dispela program.

Distrik administreta bilong Telefomin Nenes Wurin i amamas long kain teknikel asisen em PNGFA i givim long strongim sosel developmen insait long distrik na tu provins wantaim.

Mista Wurin i tok em bai sapatim dispela program na bai painim wok bilong wanpela sosel developmen opisa long mekim dispela wok.

Presiden bilong Telefomin Soka Asosiesen Kevin Bong i tok teknikel

asisen em wanpela rot i ken strongim wok bilong soka ya. Wok teknikel i kamapim referi na tu administresen bilong wok soka.

Telefomin nau i tingting long holim wanpela soka tonamen namel long ol tim i kam long Tabubil, Kiunga, Oksapmin, Aitape, Lumi, Vanimo na Nuku.

Bong i tingting long holim dispela tonamen long Septemba long dispela yia.

Wurin na Bong tu i amamas long ol nupela rul bilong soka nau i stap long han bilong ol soka pilaia bilong Telefomin. Dispela bai helpim ol lain pilai long save gut tru long ol rul ya.

Oi dispela lain skul long referi ya i lainim 17 rules olgeta, na oi i gat bilip nau long yusim dispela ol nupela rul. Narapela wok nau em long traim kisim ol dispela lain long winim wisel na lukautim ol gem.

Bihain long sampela taim oi dispela referi bai sindaun long wanpela tes na ol dispela tes pepa bai go long PNG Futbol Asosiesen long skelim na givim poin long wanwan ol referi.

PNGRFA yet bai makim ol referi na givim mak long ol. Sapos PNGFA i skelim ol lain i gutpela, em bai traim givim ol nesanel gems long lukautim olsem wok referi.

Telefomin Soka Asosiesen i statim pinis soka gem bilong ol las wiken. Dispela kompetisen ya i ran long tripela wik olgeta.



• Skul bois insait long Mosbi i wok long pulim planti papamama na publik. Dispela piksa i soim kain stail we i wok long kamap taim ol yangpela i bung long pilai.

## Knights kisim nupela sponsa

SEMPION tim bilong Goroka Knights i kisim bek Nowek olsem mesa sponsa bilong ol long dispela yia.

Nowek em wanpela kampani we i save wokim kopi na salim i go ovasia long ol man i baim.

Knights em i no nupela tim, nogat. Knights em senisim nem tasol na pilaia nem bilong klab ya em Royals.

Presiden bilong klab Charles "CD" Daniels na klab menesa John Suga i go pas long paitim toktok wantaim Nowek na ol i kisim dispela sponsa gen.

Daniels, tokim Nowek olsem Knights i bin kamap namba foa long fainels na pilai i go na winim grenfainel. Na long dispela sisen, oi bai traim long winim gen dispela taitel.

Aninit long sponsasip agrimen, Nowek bai baim afiliesen na rejistresen bilong olgeta wanwan pilaia.

### GOROKA LIG RIPOT

Na tu dispela sponsasip tu i bai baim ol pilaia husat i pilai long wiken tasol.

Menesing Dairekta bilong Nowek Terry Shelley i tokim ol tim long win na oi i ken kisim pe. Sapos wanem tim i no win, em bai i no inap kisim pe.

Na em i toktok strong tu long kamapim gutpela disiplin pasin. Sapos wanem pilaia i pait long taim bilong pilai, em bai i no inap kisim pe.

"Mi askim yupela olgeta long go pilai strongpeia futbol na winim gem. Na sapos referi i rausim yu long taim bilong pilai, em yu bai i no inap kisim pe.

Shelley i tokim ol pilaia na tu menesmen bilong klab olsem Nowek bai baim ol nupela jesi bilong ol long sampela taim bihain.

Dispela yia klab i lusim sevis bilong tupela pilaia Suwo Amas

na John Gonapa. Amos em i trenfe na go tis long Yonki na em bai ino inap kamap long pilai bikos long hevi bilong tenspot.

Klab tu i kisim sampela ol nupela pilaia olsem Sandy Tipi, Makali Aizu, Moses Iko, Brian Janduo, Kevin Tom na Andrew Mark. Iko, Janduo, Tom na Mark em ol ragbi yunion pilaia tasol ol i laik traim ragbi lig.

Oi arapela pilaia olsem John Yaldia Mogia, Chris Kanat, Nigel Hukula, Kenneth Liwayong, Benny Samo, Jack Ohuma, Winnis Moihae, Michael Kari, Dickson Gene, Ben Gene, skipper Peter Danga, Mack Siwi, Charlie Nago, Isimel Marnapal, Limu Willie, Vincent Bailey, Ferdinand Nongkas, Theo Yasiyari, John Markham, Michael Tom, Paul Payesi, Reuben Kautu, Russel Kautu na Aodis Manua i stap yet wantaim klab.





# WANTOK SPOT



• Developmen opisa bilong tennis long Osenia Lency Tenai i givim tennis bal na bet i go long Nanu Sekele bilong Kiunga OTML Recreation opis.

## Ok Tedi kirapim Liklik Tennis program

SKUL sports program bilong ol skul mangi long OK Tedi Main nau i gat nupela spots program bilong en.

Dispela nupela program em Liklik Tennis program. Menesa bilong OTML Emplois Asistens na Rekrisen menesa Andrew Wanya i opim dispela program. Wankain program tu i bin stat long Kiunga long wik antap.

Stat bilong dispela program i kamap bihain long wanpela kosa bilong Osenia Tennis Federesen Lency Tenai i bin go wokabout long Kiunga na Tabubil. Em i stap tripela wik olgeta long holim dispela kosing klinik.

Dispela kosing program bilong Tenai i pulim ol yangpela pikinini insait

long Kiunga, Tabubil na tu ol viles klostu long maining eria bilong OTML. Ol pikinini bilong ol wokman bilong OTML i wok long joinim ol poroman bilong ol long stap insait long dispela kosing klinik.

Dispela nupela tennis program bai kam aninit long lukaut bilong Star Mountain Skul Spots Asosiesen (SMSSA). Bipo dispela asosiesen ol i save kolim Star Mountain Skulbois Soka Asosiesen.

Ol arapela liklik program i kam anjnit long lukaut bilong SMSSA em Liklik soka we i bin stat tupela yia i go pinis. Dispela soka program i kamap bikpela tru namel long ol yangpela ya. Arapela em Liklik netbal we i bin stat las yia na arapela em ol i tingting

long statim em sofbal. Dispela ol liklik spots program i kamap gut bikos long gutpela sapat i kam long OTML Rekrisesen Sevis na tu ol sapat i kam long ol liklik bisnis.

OTML i bilip olsem junia spot em as bilong ol gutpela spot insiat long kantri. Na i gutpela long ol liklik pikinini i mas lainim ol gutpela pasin bilong pilai taim ol i liklik yet.

Long makim stat bilong Liklik Tennis, Tabubil na Kiunga i bin salens we Kiunga i winim dispela nupela Gol Kap.

Kosa Lency Tenai i tok em i amamas tru long holim dispela kos. Em i tok em i guria tru olsem ol mangi long bikbus bilong PNG i ken save long pilai tennis ya.

# PNG lus nogut tru long Melo kap

## HENRY MORABANG i raitim

PAPUA Niugini nesenel soka tim insait long Melanesian Kap soka resis long Fiji i lus nogut tru long han bilong kantri long wan solwara.

Long Sarere, Fiji memeim stret PNG 5-0 na long Tunde, Nu Kaledonia i bagarapim tru sindaun bilong ol boi PNG 6-1. Steven Mali bilong Yunivesiti soka klab i sutim dispela gol ya.

PNG Futbal Asosiesen (PNGFA) i laik yusim dispela Melanesian Kap olsem wanpela gem long skelim ol pilaia long redi long 2002

Wol Kap kwalifaia. Tasol nau dispela tupela lus i mas bagarapim tru plen bilong PNGFA.

Kosa bilong PNG tim John Davani i tokim Wantok olsem dispela lus i kamap bikos ol straiika i no pilai gut.

"Em i no save bilong wanem na ol straiika i no save sutim gol. I tru olsem skoa i bikpela, tasol mi ken tok tru olsem ol boi PNG i pilai gut tru.

"Em i tok Fiji na Nu Kaledonia i yusim ol gutpela sans bilong ol long sutim dispela ol gol bilong ol. Ol straiika bilong PNG olsem Francis Moiyap, John Kaling na Vincent Sili i no sutim gol," Davani i tok

Kosa i tok olsem Fiji na Nu Kaledonia i no pilai gut tasol ol straiika bilong ol i ken skorim gol olsem na ol i win. Sapos PNG i gat wankain ol pilaia olsem ol, ating PNG tu i ken win.

Dispela tupela lus tu i bagarapim sans bilong PNG long winim silva o bronz medal long Melanesian Kap.

Olsem na nau kosa Davani i tingting long mekim sampela senis long straiika long traime winim gem egensim Solomon Ailan.

Davani i tingting long rausim John Kaling na putim em riserv, na larim Francis Moiyap na Isaiah Jonah olsem namba wan straiika. Kaling na Vincent Sili bilong Kimbe

bai stap long bens.

Na long midfil, Mista Davani i tingting long rausim Joe Aisa na putim em i go long raitbeks na bringim Richard Daniel long win i kam sapatim midfil. Daniel nau bai poromanim Ken Gule, Geoffrey Emang na Steven Mali.

Yanpela Tapas Posman bai kisim ples bilong namba wan golkipa David Aua.

Aua i brukim het bilong em taim em i bam wantaim ain bilong golpos taim em i laik sevim bal ya.

Davani i tok em i no gat wari long beklain tasol em i gat bikpela warit tru long fowat long lukim ol straiika i mas sutim gol.

"Mi ting fitnes bilong John Kaling i no gutpela tumas. Em tasol i no kamapim gutpela pilai bikos long taim bilong trening, em i strong tru we ol selekta i ting em bai skorim gol bilong PNG ya," kosa i tok.

Em i tok olsem Kaling inap skorim planti gol tru egensim Fiji na Nu Kaledonia tasol nau nogat ya.

Mausman bilong PNGFA Seth Daniel i sapatim toktok bilong Mista Davani na tok olsem ol boi PNG i pilai gut tru. Skoa bilong ol gem ya i tru tasol dispela i no mak olsem PNG i pilai krangki.

"Olgeta pilaia i stap wantaim na redi tasol long bungim Solomon Ailans tude," Mista Daniel i tok.

# Em i Gutpela Em i Tuna Em i bilong PNG stret...



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.